

ASO LUA, 20 TESEMA 2022

Na nofoia e le Fofoga Fetalai le Nofoa i le itula e 9:24 i le taeao e tusa ai ma Polokalame o Fonotaga a le Palemene 2022/2023.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoaofa Faitulafono.

MALELEGA MAI LE AO O LE MALO

Na fofogaina e le Fofoga Fetalai le Malelega Mai le Le Ao o Le Malo.

TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliaga i le Fono Aoaofa Faitulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe Faaopoopo (Nu.1) 2022/2023.

TUUIINA ATU i lou nei Lima i lenei aso.....19..... o Tesema 2022.

Sainia: **Tuimalealiifano Vaaletoa Sualauvi II**
O LE AO O LE MALO

FAAALIGA MAI LE TAITAI O LE MAOTA

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoao Faitulafono mo le iloiloina o Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o le Faasologa o Tiute 2022.
2. Tulafono Tau Faaofi o Teuteuga o le Tulafono o Fanua ma Suafa 2022.

TUUINA ATU i lenei aso.....Gafua.....19 o Tesema i le tausaga 2022.

Hon. FIAME Naomi Mataafa
TAITAI O LE MAOTA

TUSI FAAMAONIA O LE TULAGA FAANATINATI

E tusa ai ma le Tulafono Tumau 100(2) ma le 102(2), ua tuuina atu nei le Faaaliga i le Fono Aoao Faitulafono mo le iloiloina o Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o le Faasologa o Tiute 2022.
2. Tulafono Tau Faaofi o Teuteuga o le Tulafono o Fanua ma Suafa 2022.

TUUINA ATU i lenei Aso.....Gafua.....19 o Tesema 2022.

Hon. FIAME Naomi Mataafa
TAITAI O LE MAOTA

SAUNOAGA FAAFEILOAI A LE FOFOGA FETALAI

FOFOGA FETALAI: A o le i tuuina atu Isi Faasilasilaga a le Fofoga Fetalai, e muamua ona ou faatalofa atu i le paia o le tatou Maota, i le afio o lau Afioga i le Taitai o le Maota lau Afioga i le Tamaitai Palemia, afio lau Afioga i le Sui Palemia, afifio a outou Afioga i Minisita o le Kapeneta, tainane a outou Afioga i Minisita Lagolago.

E faatalofa atu foi i lea Itu o le Maota i lau Afioga i le Sui Taitai o le Itu Agai ma le mamalu o sui usufono uma o le Palemene. E faatalofa atu foi i le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo ua mafai ona tatou auai faatasi. Malo le soifua manuia, malo le lagi e mama i lenei taeao. Tatou te faafoi lava le taulaga o le faamanu ma le faaneetaga i lo tatou Atua ona o Lona alofa ma Lona agalelei ua tatou fesilafai ai i le manuia i lenei taeao.

E le uma foi le suamalie o le upu a le Atua e pei ona tatou i ai i le tatou mafutaga tatalo i le taeao. E faia lava e le Atua avanoa lelei e faasoa mai ai Lona finagalo e fai ma fu'efu'e i le tatou folauga. E i ai foi la lo tatou talitonuga, ua o se fatu e pau i le eleele lelei, tau ia ina ia tupu ma ola e fai ma sulu i taimi o le pogisa.

E le faagaloina foi le tapuaiga a Samoa i ona tafa e fia, lau Afioga i Le Ao Mamalu o le tatou Malo ma lau Masiofo, lau Afioga i le Sui Tofia ma lou faletua, lau Afioga i le Faamasino Sili ma le mamalu o le Faamasinoga, le paia i Ekalesia e fia Kerisiano uma i Samoa, faapea le aufaigaluega tofofi o le talalelei.

E le vaea foi le falaooto i paia faaifogata o Samoa, i Aiga ma Tama, o Tama ma Aiga, le usoga a Tumua ma Pule, Ituaui ma Alataua, Aiga i le Tai ma le Vaa o Fonoti, ae tainane le tapuaiga a o tatou uso i Sasae, ma so o se Samoa o faafofoga tapuai mai i tafa e fia o le lalolagi. E faatalofa atu lau Palemene i lenei taeao. Malo i lo outou soifua manuia ma le lagi e mama. Tapuai maia ma le manuia.

Le alofaiva o le tatou Maota i lenei taeao, e faamanuia atu le Fofoga Fetalai, ia agalelei le Atua ma to mai le lagi manu i le tofa tatala ma le utaga tuutumamao, aua mataupu o le a soalaupuleina.

Manuia le usugafono a lau Afioga i le Tamaitai Palemia ma lau Kapeneta, manuia le usugafono a itumalo e fia o le atunuu.

ISI FAASILASILAGA A LE FOFOGA FETALAI

Ua silafia uma e le tatou Maota faapea le faafofoga tapuai mai a le atunuu, ia Faasilasilaga Faalauaitale na faia e nisi o sui o le Vaega Faaupufai e Puipuia Aia a Tagata (HRPP), ma faailoa ai lo latou faamavae mai ai i la latou Vaega Faaupufai.

O le aso 3 Novema 2022, na faasilasila faalauaitete ai e le Tofa Hon Tuuu Anasii Leota, o le sui usufono mo Siumu ma le Tofa Ale Vena Ale, o le sui usufono mo Faleata 4, la lona faamavaega mai le HRPP. A o le aso 27 o Novema 2022, na faasilasila faalauaitete ai e le Afioga Mauu Siaosi Puepuemai, o le sui usufono mo le Vaa o Fonoti, lona faamavae mai ai i le HRPP.

O le aso 14 o Novema 2022, na tuuina atu ai e a'u nei o le Fofoga Fetalai se Faasilasilaga o Moliaga i lalo o Tulafono Tumau ma le Tulafono o Faiga Palota 2019 i le sui usufono mo Siumu ma le sui usufono mo Faleata 4, e tusa o laasaga o lenei mataupu.

O le aso 28 o Novema 2022, na tuuina atu ai foi e le Fofoga Fetalai se Faasilasilaga o Moliaga i lalo o Tulafono Tumau ma le Tulafono o Faiga Palota 2019 i le sui usufono mo Vaa o Fonoti.

E tusa ai ma le Mataupu 46 o le Faavae o le Malo Tutoatasi o Samoa ma Fuaiupu 141 – 143 o le Tulafono o Faiga Palota 2019, ua i ai mafuaaga ua talitonu ai le Fofoga Fetalai e faapea, ona o le mataupu i le Faasilasilaga Faalauaitete na faia e sui usufono ua taua i le aso 3 o Novema 2022 ma le aso 27 o Novema 2022, e faapea, o se avanoa ua tulai mai i Nofoa o ia itumalo i le Palemene.

Ua maea foi ona faailoa i ai e le Fofoga Fetalai le faavae o mafuaaga o le taunuu i lea tulaga.

O moliaga e faasaga i sui usufono ua taua, na faavae e tusa ai ma aiaiga o Mataupu 46(1) ma le (3) o le Faavae ma Fuaiupu 141 – 143 o le Tulafono o Faiga Palota 2019 ma Tulafono Tumau a le Palemene.

O le aso fono lenei, na faatonuina ai e le Fofoga Fetalai e tuuina mai ai Tali a ia sui usufono e toatolu e tusa o le Faasilasilaga na tuuina atu i ai e le Fofoga Fetalai. Na fautuaina foi ia sui usufono, ina ia o latou faailoa mai pe ta'utino mai pe latou te teena moliaga e faasaga ia i latou.

E ui i aiaiga o le Fuaiupu 142(1) o le Tulafono o Faiga Palota 2019, e amanaia tele e le Fofoga Fetalai ia aia tatau faale-Faavae a ia foi sui usufono, ma ua ou manatu ai, e ao ona faatino pea le laasaga lea i totonu o le Maota ma saunoa sa'o mai ai sui usufono o lo o aafia a o faafofoga manino le tatou Palemene.

Ona o lea, ou te tuuina atu ai le avanoa i sui usufono e toatolu ua taua, e tutulai mai ai ma faailoa mai, pe latou te talia le moliaga, pe teena foi.

Na ona toe faamanatu atu i a outou Afioga, e le o se avanoa mo saunoaga faaumiumi. E pau lava le mea o lo o moomia, ina ia faaleo lou finagalo pe e te tautino e te talia le teena o moliaga e faasaga i lau Afioga i le sui usufono mamalu. Aua le toia le va sui usufono mamalu. Aua le toia le va.

FOFOGA FETALAI: Ou te tapa le Afioga i le sui usufono mo Siumu. Tulai mai lau Afioga i le sui usufono mamalu.

Tofa Hon TUUU ANASHI LEOTA (Siumu): Faafetai mo lou avanoa i lau Afioga i le Fofoga Fetalai. Ae le i faia lau faaliga, ou te muamua ona ou faafeiloai atu i lau Afioga i le Fofoga Fetalai. Afio foi lau Afioga i le Tamaitai Palemia, afio le Afioga i le Sui Palemia, afifio foi le paia maualuga i Minisita o le Kapeneta, afifio foi Afioga i alii Minisita Lagolago.

Ou te faatalofa atu foi i le Sui Taitai ma sui usufono mamalu o le Itu o lo o Agaia le Malo, po o le Vaega Faaupufai o lo o latou Puipuia Aia Tatau a so o se Tagata Samoa o soifua i Samoa ma fafo atu o Samoa.

O paia o Samoa lea ua maea ona paelago e lau Afioga, ma o le a le toe o o i ai se faamatalaga. Ae ou te fia pai pea i si ou itumalo, o lea e faafogafoga mai le paia ia Sa Asomua ma Aiga e Lua, ia, lau Fetalai Tuuu ma lo outou Aiga Sa Tuuu, le Falelua o Tulafale, le Fofoga o Alataua, Utaileuo ma le mamalu i le Faletolu, ae tainane le tapuaiga mau a le aufaigaluga paia a le Atua o lo o faapena ona faafalelemalu i totonu o le tatou itumalo, aua le semana o se manuia o si o tatou itumalo.

Ae lau Afioga i le Fofoga Fetalai, ou te talitonu o le aso, o se taeao ese lenei, ona o le mea muamua lenei ua tupu i totonu o le Maota lenei, o le Palemene lenei talu ona tutoatasi. O le aso o le a finauina le saogalemu o le Nofoa o lou itumalo. O lea o le a faamasino mai lau Afioga, faamasino mai le mamalu o le Maota nei, faamasino mai Samoa, ae faamasino foi lou itumalo.

O le fesili lau Afioga i le Fofoga Fetalai, o le a sau agasala? O se agasala mamafa lou faamavae mai le Vaega Faaupufai e Puipuia Aia Tatau a Tagata? O se agasala ea lea mea lau Afioga? O le Faavae na tapenaina e o tatou tuua, ina ia ola saoloto ma ia amanaia a tatou aiatatau ma aiatatau a so o se Samoa o lo o soifua. O nei Tulafono uma lau Afioga na tapenaina mo le sologa lelei o galuega a le Palemene, ma po o fea lava e faatulaga i ai nei Tulafono, aemaise mo le lelei, le nofo lelei ma le filemu o le atunuu. Ae a fafau loa e se tagata e toatasi poo se vaega toaititi ona o ni manatu faumalo, fiapule ma le faamaualuga, ona faaletonu loa lea. O le Faavae, o Tulafono Tumau ma le Tulafono o Faiga Palota, sa mafai lava ona e tutoatasi pe afai ua e le lagolagoina ni fuafuaga a se Vaega Faaupufai sa e i ai, ae tapu loa...

Tofa Hon Lauofo Fonotoe Nuafesili Pierre Lauofo (Sui Taitai o le Itu Agai): Lau afioga i le Fofoga Fetalai o le fesili ma le mea e fia faasao ona e popoe lava le taofi i saunoaga a le sui usufono...

Tofa Hon TUUU ANASHI LEOTA: E sau loa i se vaega faaupufai ua teuteuina uma nei Tulafono ma le Faavae...

Tofa Hon Lauofo Fonotoe Nuafesili Pierre Lauofo: O lea e saunoa faapea na fausia e se tagata e toatasi Tulafono ia ma le Faavae. E leai.

Tofa Hon TUUU ANASII LEOTA: E le Taitai o le Faigamalo a le tatou Vaega le HRPP.

Tofa Hon Lauofo Fonotoe Nuafesili Pierre Lauofo: O le Tulafono ma le Faavae na pasia e le Maota leni. Ma o le sui usufono lea e saunoa, sa ioe i ai, sa palota ioe i Teuteuga ia.

FOFOGA FETALAI: Se i onosai mai lava. Ou te faamalulu i le Sui Taitai, e lelei lou lavapapale mai lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Ia, leaga o lea ou te tatalo atu i lau Afioga, leaga e tatau ona faasao le saunoaga a le sui usufono lea. Na pau lava le mea lea e aumai i le Tulafono, ioe pe leai.

FOFOGA FETALAI: Ia, onosai mai, onosai mai lalo se i faamaea mai le sunoaga a le sui usufono.

Tofa Hon TUUU ANASII LEOTA: E oo atu lava lau Afioga i le Sui Taitai i le vaega lea.

FOFOGA FETALAI: Ou te fautuaina foi lau Afioga i le sui usufono mamalu, ia tau tuutuu mai le saunoaga ia faigofie foi le tatou mataupu.

Tofa Hon TUUU ANASII LEOTA: Ua tapu uma lau aiatatau e te tutoatasi ai, ou te matua talitonu na matua tapena e le tatou Taitai, ia aua lava ne i toe sao se isi i tua, ae pule toatasi ai ia ma le saua i sui usufono mamalu o itumalo o lo o lagolago malosi i le HRPP.

Lau Afioga i le Fofoga Fetalai, o lau aiatatau.... o lau aiatatau... o lau aiatatau...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ou te matau o le a sese lava le mea lea o le a o o i ai le mataupu a tatou i le taeao leni. O lea o le a amata sese. E leai e tatau ona ou tulai atu leaga e toa-2 isi sui usufono ia e le i saunoa.

Tofa Hon TUUU ANASII LEOTA: O aiatatau a sui usufono uma o le Palemene, lea ua ou tulai atu ai e fai ma sui... o lea ua ou tulai atu... lea ua ou tulai atu...

FOFOGA FETALAI: Se i onosai mai o lea e fai atu le Nofoa. Onosai mai. Silasila mai lau Afioga i le Sui Taitai o le Nofoa lea e fai atu. Onosai mai. O lea se i fai le tala i o.

Tofa Hon Lauofo Fonotoe Nuafesili Pierre Lauofo: A o lea ou te tatalo atu lau Afioga se i faasao le sui usufono lea.

Tofa Hon TUUU ANASII LEOTA: O lea ua ou tulai atu e fai ma ositaulaga. Po o le a lava lona taunuuga, ou te finauina ma faasao lenei sese.

FOFOGA FETALAI: Lau Afioga i le sui usufono mamalu, se i fai atu le tala a le Nofoa. Ia, e lelei lava le tatou... e pei lava ona ou fai atu i le taimi ua fano, e manaomia lava lo tatou felagolagomai aemaise foi le tofa tatala ina ia maua pea le toamalie ma le filemu o le tatou Maota. E i ai foi le itu e manumanu ai foi le Nofoa i le soona taua o nisi e le o mafai ona tali mai totonu o le Maota.

O le agaga lena lau Afioga i le sui usufono mamalu, o le avanoa, o se avanoa e tautino mai ai i le teena ma le ioeina o lenei... ae o lo o i ai i tua atu o le isi vaega e faatinoina mea uma ia.

Ia e pei o le fesoasoani atu lena i le sui usufono mamalu. Lau Afioga i le sui usufono mamalu, o oe foi o le sui usufono matua o le Maota.

Tofa Hon TUUU ANASII LEOTA: Ia faafetai i lau Afioga. Afai ou te tali atu ou te teena, ona puupuu lea lau Afioga, ae tatau ona manino ma malamalama i le mafuaaga ua ala ai ona ou tulai ese. Aua e mafai ona ou faapea atu lau Afioga, ou te matua teena nei moliaga.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e le taua mafuaaga, e le taua mafuaaga ua faamavae ai ma le Vaega Faaupufai. E le o se mataupu tau Palemene lau mataupu lena e te saunoa mai ai.

FOFOGA FETALAI: Onosai mai.

Tofa Hon Lauofo Fonotoe Nuafesili Pierre Lauofo: O au a mafuaaga o au na mafuaaga. A e agai i lou itumalo, e le aumaia au mafuaaga faa-Vaega Faaupufai i totonu o le Maota lenei, e le o se galuega lena a le Maota.

Tofa Hon TUUU ANASII LEOTA: Onosai mai o lea ou te lauga. O lea ou te fai lau...

Tofa Hon Lauofo Fonotoe Nuafesili Pierre Lauofo: Ave i le faamasinoga.

Tofa Hon TUUU ANASII LEOTA: Aua e te soona le mafaufau faapena. Se fuafua.

Tofa Hon Lauofo Fonotoe Nuafesili Pierre Lauofo: Ou te le o mafaufau o oe lena e te le mafaufau.

Tofa Hon TUUU ANASII LEOTA: O lea ou te tautala i le mea e tatau ona ou tautala i ai.

Tofa Hon Lauofo Fonotoe Nuafesili Pierre Lauofo: O ai lena e te tuuaia? O ai?

Tofa Hon TUUU ANASII LEOTA: I. O lea e tuuaia le mafuaaga lenei.

Tofa Hon Lauofo Fonotoe Nuafesili Pierre Lauofo: A o ai le tagata lena e te tuuaia?

Tofa Hon TUUU ANASII LEOTA: O oe. O le Taitai.

Tofa Hon Lauofo Fonotoe Nuafesili Pierre Lauofo: O lena e te agai i le Taitai o le HRPP, e le o nofo atu i i.

Tofa Hon TUUU ANASII LEOTA: E mafua mai ia oe o le Sui Taitai i lou le faia o lou tofi.

Tofa Hon Lauofo Fonotoe Nuafesili Pierre Lauofo: E le o se tofi lena o au, e le o sou tulaga foi lena.

FOFOGA FETALAI: Ou te faamalulu atu sui usufono mamalu. Ia, ua felaasai tala ma upu i lenei taeao. Ou te fesoasoani atu foi i lau Afioga i le Sui Taitai, e tatau foi ona e lavapapale ma lava lou onosai, o lea e faafogafoga mai o lea lava e tau ave le feau i le sui usufono ina ia faapena ona tatou galulue faatasi. A o le tatou fetauai faapea, a fai atu nei la se faaiuga a le Nofoa ia oulua, o le a la la mea o le a tua i ai lenei mea?

Fai ma vaai mai ma silasila mai o le Nofoa lea e vaavaai atu. E le aveai foi le tatou va lelei ma le alofa atu ma mea o le a outou solia ai le Tulafono a le Maota.

O le mea lea, o lea ua uma ona ou tapa, onosai, onosai mai. Ma le isi mea, a faauilavea le tagata, ui muamua mai i le Fofoga Fetalai. Ou te le toe taliaina se tagata e soona tu mai luga ma fai mai ni faamatalaga. Faau mai pea i le Nofoa.

Le sui usufono mamalu mo Siumu...

Afioga Hon Loau Solamalemalo Keneti Sio (Sagaga 1): Ioe lau Afioga i le Fofoga Fetalai, e tulai atu lava ma le ava tele...

FOFOGA FETALAI: Onosai mai, onosai mai le sui usufono mamalu. Le sui usufono mai Siumu, ia o lea ua ou faalava atu, ua ou faalava atu ina ia faailoa mai, o nisi mea e tolaulau, ou te faamalulu atu, atonu e i ai se taimi, ma e ese foi le mea e tatau ona ave i ai.

O totonu lava ia o le Palemene, lea e taumafai ina ia faaali atu pe te ioeina pe teena le faamoemoe lea ua avatu i lau Afioga i le sui usufono mamalu. Na pau lava lea. A o nisi tulaga uma, ia o le mea la lena e lafo atu i lau Afioga ma nisi au fuafuaga o i talaatu. A o totonu lava ia o le Palemene, o le mea lea, ia utagia mai, o le mea foi lea na avatu ai se tala a le Fofoga Fetalai i le amataga, ia outou utagia, ina ia.... E manaia lava le puupuu o a outou tala ia ua tuuina mai tusitusia. Ae i ai le manatu faapena, ia tatou galulue faatasi. E le aoga foi le tatou tatalo i le taeao segisegi ae tatou vevesi.

O le mea lea le sui usufono mamalu mai Siumu, ia faautagia mai se tala a le Nofoa. Ma le agaga faaaloalo.

Tofa Hon TUUU ANASII LEOTA: Ia, faafetai i lau Afioga i le Fofoga Fetalai. E faamalulu atu foi i lau Afioga ma le mamalu o le Palemene nei, e i ai foi se tulaga ua laalaa ai foi le leo, e faamalulu atu i lau Afioga. Ae ua ou tulai atu ma lou faaaloalo, ou te matua teena uma lava moliaga ma tuuaiga e pei ona tuuina mai i lou tagata faatauvaa. Ae faafetai i lau Afioga mo le avanoa. Manuia le tatou Fono.

FOFOGA FETALAI: Malo faafetai. Ia, o lea ua faamauina e le Palemene lou teena o moliaga na tuuina atu i lau Afioga. Ia malo faafetai.

Ia, o le avanoa lenei ou te tapa lau Afioga i le sui usufono mo Faleata 4, ia tulai maia lau Afioga i le sui usufono mamalu, o lea ua e maua mai le agaga o lenei taeao. Ia o lo o i ai laasaga i talaatu o le Maota lenei e faatino ai nisi fuafuaga ma nisi faamoemoega. Ma le agaga faaaloalo.

Tofa ALE VENA ALE: Faafetai i lau Afioga i le Fofoga Fetalai ona ua matala ia sega lou finagalo e mafai ai ona tuuina mai se avanoa i lou nei sui usufono ou te tali atu ai i luma o le Palemene e tusa ai ma le mataupu ua i lumamea nei o le Fonousu a Samoa ona o lau faamavaega mai lau Vaega Faaupufai, aemaise foi o le Tulafono o Faiga Palota.

Ia, le paia o lenei taeao i le faafogafoga tapuai mai a le atunuu, tulouna ia le paia o Samoa i ona tafa e fia. Tulouna foi le paia o le Maota o le Palemene i le affio o lau Afioga i le Fofoga Fetalai ma sui usufono mamalu uma o le Maota o le Palemene i lenei taeao. O lea foi ua mautu atu i le lagi

aua le Atua ma Lana silafaga paia, le tatou taulaga osi o le faafetai. Ia tatou saga viia ai pea lo tatou Atua manumalo ona o lana faatautaiga, Lona alofa ma Lona agalelei ua mafai ai ona taitaiina mai le soifua laulelei o sui usufono uma o lenei Maota aua a tatou mataupu o le a lauiluina i lenei taeao.

Lau Afioga i le Fofoga Fetalai, ua ou taulimaina lau tusi o le aso 14 lau Afioga e pei ona e faailoa mai. O lenei foi ua tauaaoina e lau Afioga lau tali tusitusia faatasi ai ma mafuaaga o lou faamavae mai lau Vaega Faaupufai o le HRPP. Lau Afioga, e tele ma anoanoai le mau mataupu ua afua ai ona ou manatu ou te faauiese mai lau Vaega Faaupufai, ma o le a ou le toe tolaulauina ua agiga foi i luga o upega tafailagi, ua soo foi le lalolagi atoa i le tele o taimi i mafuaaga foi ua tuuina atu. Ma e le o le taimi muamua foi lenei lau Afioga ua ou faaleoina ai i le Maota lenei lou matua teena o le Tulafono lea.

Ma ou te faapea atu i luma o lenei Palemene ma lau Afioga i le Fofoga Fetalai, ma le faafogafoga tapuai mai a le tatou atunuu ma lou itumalo pele o Faleata 4, ou te matua tetee, tetee, tetee, ou te matua tetee lava i moliaga ua faasaga ia te au atoa ai ma lou teena o le Tulafono o Faiga Palota.

Lau Afioga i le Fofoga Fetalai, o le Tulafono lea o Faiga Palota, ua aveesea ai lou aiatatau o au o le sui usufono ou te filifili saoloto ai i se mea e manuia ai lou itumalo, lea ua aveesea i i le Tulafono lea.

FOFOGA FETALAI: Ia, faafetai. O lea ua maua lou finagalo, ou te talitonu foi e le fou foi lau lauga i ia tulaga i ia vaega o le Tulafono. Ou te manatu, o lea ua faamauina lou teena o ia moliaga, ia, o lea foi ua faafogafoga le tatou Palemene ma le Maota.

Tofa ALE VENA ALE: Lau Afioga, ou te iloa o le a ou usitai atu i lou finagalo, ae o lea e silasila mai le matou Vaega Faaupufai, o mafuaaga lava ia ua ou alu ese ai, o le matou Taitai. Ioe. Ia, a o lenei ua lafo atu, contempt of court, contempt of Parliament, ou te le toe taliaina se Taitai.

Ia manuia tele le Fonousu a Samoa. Faafetai.

FOFOGA FETALAI: Faafetai. E fautua atu pea i tatou saunoaga, o le tatou Tulafono Tumau lava ia, e aua le taua se tasi e le mafai ona tali mai i totonu o le Palemene. Ae o lenei ua maua lou finagalo, ua e teena ia moliaga na tuuina atu, ia malo faafetai. O lea foi ua faamauina i totonu o le Palemene. O le avanoa lenei ua ou tapa ai le sui usufono mo le Vaa o Fonoti. Tulai maia lau Afioga i le sui mamalu.

Afioga MAUU SIAOSI PUEPUEMAI (Vaa o Fonoti): Lau Afioga i le Fofoga Fetalai, e muamua ona momoli atu le agaga faafetai tele e tusa foi o le avanoa ua tuuina mai i lou foi sui usufono e folasia ai foi se lagona, a o

se manatu vaivai foi, aua le faamoemoe o lenei taeao o le Fonousu a le atunuu.

Ae le i folasia la se faatauva, e i ai le taofi ua maea ona fetuunai ma poupou i lima le faamoemoe o lenei taeao. O lea foi ua maea ona susue iu o folasa o Faleula nai le vai suatoto. Ae a le lautaamu fai mai o lea ua maea ona oto ae toto, aua lo tatou tatou vatapuia ma le Atua Foafua. Ona manatu lea, o lea ua logo talalelei i le vii o Tuipologa, e tusa ai o le feau folafola, ae o se susuga pau foi, e pei ona taitaia ai e le Susuga i le Tama Toeaina ia Tasimeta i le taeao ua sola. O lea foi ua piiama se faaoololomaau i le Atua, e pei foi ona faaopopo e lau Afioga i le Fofoga Fetalai.

Ona ou manatu lea, tea ia i lagi ona vii, ae tatala mea faasolo le faipule o le Vaa e tasi i le atunuu, e tasi lava le Vaa, le itumalo o le Vaa o Fonoti.

O le faamoemoe o lenei taeao, o le upu moni a na le seanoa le Atua, tatou te le penei i totonu o le Maota Fono a Samoa. O Lana Taitaiga lea ua tatou molimauina.

Ou te fofola faaautafa ai le fala i lau Afioga i le Fofoga Fetalai, ma ou ofo faatalofa atu ai i le paia maualuga o lenei Maota. I le afio i le Afioga i le Tamaitai Palemia, afioga i le Sao Faapito, afioga ia Fiame Naomi Mataafa. Afio foi le afioga i le Sui Palemia, ae a le mamalu maualuga o afioga i Minisita o le Kapeneta. A o se faufautua a o se tuualalo i afioga i Minisita, vaeane le tapuaiga i le Afioga i le Sui Fofoga Fetalai.

O lea foi e afio atu le Afioga i le Sui Taitai o le Itu Agai, le fetalaiga ia Lauofo Fonotoe Pierre, aemaise o sui usufono mamalu uma o lenei Maota ua mafai ona tatou faatasia.

Ae a le mamalu o Ofisa Sili o Matagaluega ma Faalapotopotoga Tumaoti ae a Pisinisi ma Faalapotopotoga. E faatalofa atu foi i le afio mai o lau afioga i le Failautusi ma lou soatau. Ae a le mamalu o le Ofisa o le Fono ma Samoa ua potopoto i lenei taeao.

O lea ua uma ona tafesilafai le faautaga ma le faasuaga aua paia o Samoa mai lava i ona mauga tetele seia oo lava i mauga iti, e le toe oo i ai se leo o le Vaa o Fonoti.

Ae ua ou manatu o le a tautino loa le solo a le tamaloa. E manumanu foi i lenei aso, e tele mataupu aemaise foi o fuafuaga ma aulape e i ai i le tatou Palemene.

O le taeao analeila, sa ou faalogologo lava ma le totoa, faalavelaveina, e ese foi le feau sa momoli mai, a o se upu foi faale-agaga, a o ni manatu fou foi e tapue ai le agai i luma. Ia o lea ua silafia ma faafofoga, viia le Atua.

A o tulaga e pei ona i ai le aso i le ala o le tulai o lenei itumalo, la e faafogafoga mai si ou itumalo, le Vaa o Fonoti, aua le afio o Ulualofaiga ma le matua o Talamaivao, faapea foi aiga e lua ma le nofo a Usoalii, le Toafa ma e na Taitao, Aumua ma Luatua ma le mamalu o le auvaa o Fonoti le tupu.

O lea ua ao Samoa i lau tusi faamavae ma e le toe oo i ai se leo, ae tau ina ou faapea atu. Le paia e o le aufaigaluega, lau Susuga i le Tama Toeaina, lau susuga Asotasi, Lutime ma le faletua ia Savaliga, le paia o le Aiga Sa Levi ma le loaloa o lou itumalo. Ou te tautino atu, lau Afioga i le Fofoga Fetalai, faafofoga le atunuu e le gata o Samoa nei a o atunuu e mamao, ou te teena ai le tusi e pei ona tuuina mai.

Ua faaiu a matou tala, ia manuia tele le Kerisimasi, manuia foi le Tausaga Fou le paia maualuga o le Palemene aemaise Samoa aoao o faafogafoga mai. Ia taitai e le Atua lo outou soifua a o faataumuaava le tatou sa. O le agaga foi o le faamoemoe o lumanai, o le pepe fou. O le a lona uiga? O le tatou faaolataga na tapena e Iesu, ia o tatou maua le loto fefaamagaloi. O a futia ua sola, o lea ua faataumuaava, o lea foi ua tatou faalogoina le tele o pese o lagi pea e televise, a o se feau e molimoli mai, a o se faamanatu foi, faagalo ia futia ua sola. Aumaia ia le agaga o le pepe fou, e faafouina ai i tatou, e leai se isi o i tatou e atoatoa. E tofu le tagata ma ona vaivaiga, ae ua na o le Atua e faamasino.

O le mea lea ne i umi naua, o lona ua fofola atu, lou teena o lou moliaga, ma le agaga faaloalo. Manuia le Fono a le atunuu.

FOFOGA FETALAI: Ua faamalo faafetai saunoa i le sui usufono, faafofoga foi ma le totoa le paia o le Maota ia outou saunoaga manino e tusa ai foi o taualumaga ma ala o le Tulafono, e pei ona ua uma ona faailoa atu ia outou afioga. O lea ua manino foi lenei mataupu i le faafogafogaaga a le Maota, malo faafetai.

E tusa ai o a tatou Tulafono Tumau, e leai se felafolafoaiga e faia i lenei mataupu.

Tulai mai lau susuga i le Sui Fofoga Fetalai.

Afioga AUUAPAAU MULIPOLA ALOITAFUA MULIPOLA (Taitaifono Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae): Ioe lau Afioga i le Fofoga Fetalai, faamalo le onosai, e le faigofie le pale ma le folau. Lau Afioga, o lea ua faafofoga manino le Palemene lenei i finagalo faaalua o sui usufono o lo o aafia i lenei mataupu. E tusa ai ma aiaiga o le Fuaiupu 42 (3) o le Tulafono o Faiga Palota 2019, o lea ou te tulai ai e faatu le lafo e faapea, *Ina ia faasee atu moliaga i le Faamasinoga Sili mo sana faaiuga i lenei mataupu, e tusa ai ma aiaiga o le Mataupu 47 o le Faavae.*

O le lafo lea lau afioga ma le faaloalo.

Faaluaia e le Minisita mo Faatoaga ma Faiga Faiva ma le Minisita o le Soifua Maloloina.

Na faamaonia le lafo.

SAUNOAGA O MALIU

Na faasilasila e le Fofoga Fetalai i le mamalu o le Palemene le tuumalo o le Afioga Hon Tapunuu Niko Lee Hang i le aso 29 o Novema 2022.

O le Afioga Hon Tapunuu Niko Lee Hang, e lima (5) Paeaiga sosoo a le Palemene na avea ai ma sui usufono o le Palemene.

Na uluai filifilia ma avea ma sui usufono o le Palemene i le aso 29 Oketopa 2001, ma faatautoina i le aso 18 Tesema 2001 i le maea ai o le Faiga Palota Laitiiti a le Au Palota Taitoatasi (Individual Voters) i lona suafa NIKO Lee Hang. E tusa lea o totonu o le tausaga muamua o le Paeaiga Lona XIII o le Palemene, mai le tausaga 2001-2006.

Na toe filifilia i le paeaiga lona XIV mai le tausaga 2006-2011. Na toe filifilia foi e fai ma sui o le Palemene mo le Au Palota Taitoatasi i le Paeaiga Lona XV mai le tausaga 2011-2016 i lona suafa PAPALIITELE Niko Lee Hang ina ua amanaia le umia e sui usufono o le Palemene mo le Au Palota Taitoatasi o suafa matai e tusa o Teuteuga o le Faavae.

Na toe filifilia foi i le Paeaiga Lona XVI mai le tausaga 2016-2021 o se Sui Usufono o le Palemene mo le Itumalo Nuu Tu Taulaga, e pei ona suia ai le Au Palota Taitoatasi e tusa ai o Teuteuga o le Fa'avae 2015.

Na toe filifilia foi o ia i le Paeaiga lona XVII mai le tausaga 2021 seia oo ina tuumalo, i lona suafa TAPUNUU Niko Lee Hang, o le Sui Usufono o le Palemene mo le Itumalo Palota o Vaimauga 3.

O nei Paeaiga sosoo e lima (5) sa ia nofoia ai le Nofoa o lona itumalo i le Palemene, sa avea ai o ia ma sui o le Vaega Faaupufai e Puipuia Aia Tatau a Tagata, po o le HRPP.

Sa galue o ia i nisi o Komiti Filifilia a le Palemene. E mai le:-

1. Tausaga 2001-2006, sa avea ai o ia ma Sui Taitaifono o le Komiti o Leipa, ae na tofia foi e avea ma sui usufono o le Komiti o Faamatalaga o Tupe a le Malo ma le Komiti o Fefaatauaiga;
2. Tausaga 2002-2006, sa avea ai o ia ma sui usufono o le Komiti o Faiga Palota;
3. Tausaga 2006-2011, sa avea ai ma sui usufono o le Komiti o le Maota;
4. Tausaga 2011-2016, sa avea ai o ia ma Taitaifono o le Komiti o Tupe Maua ma Tupe Totogi a le Palemene;

I le Paeaiiga o lo o faagasolo nei, sa avea ai foi o ia ma sui usufono o le Komiti o Tupe Maua ma Tupe Totogi a le Palemene, seia oo ina faamanava e le Atua ana galuega.

A o avea ai o ia ma sui usufono o le Palemene, sa tofia ma filifilia i le Saofaiga a le Kapeneta i tofiga:

1. Minisita o Tupe, mai le tausaga 2006-2011; ma le
2. Minisita o Galuega, Felauaiga ma Atinae Eseeese, mai le tausaga 2016-2021.

Sa tofia foi e avea ma:

1. Minisita Lagolago o le Matagaluega o Tupe Maua mai le tausaga 2004-2006;
2. Minisita Lagolago o le Matagaluega o Faamasinoga ma Pulega Tau Faamasinoga, mai le aso 17 Ianuari 2002-2004; ma le
3. Minisita Lagolago o le Matagaluega o Fesootaiga ma Faamatalaga Tekonolosi, mai le tausaga 2011-2016.

E avea ai lenei avanoa e fai ai a'u ma sui o le Palemene e molimoli atu ai faamafanafanaga ma faamaisega i le faletua ma le nofo-a-alo aemaise o aiga ma le itumalo, ona o Le sa pele, ua toesea ona o le valaau a le maliu ma le oti.

O le mea lea ou te valaau atu ai ma le agaga maualalo i le mamalu o le Palemene, ina ia tatou tutulai faatasi ma le filemu mo se minute e tasi, e faailoa ai lo tatou faaaloalo i le sui usufono ua fai i lagi le folauga.

Na tutulai filemu le Maota mo le minute e tasi e faaalua ai lo latou faaaloalo i le sui usufono ua tuumalo.

TUUINA ATU O PEPA

Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).

1. P.P.2022/2023 Nu.48, Lipoti Faaletausaga a le Ofisa o le Loia Sili mo le Tausaga Faaletupe 2020/2021;
2. P.P.2022/2023 Nu.50, Lipoti Faaletausaga a le Iunivesite Aoao o Samoa mo le Tausaga Faaletupe 2021/2022;
3. P.P.2022/2023 Nu.70, Lipoti Faaletausaga a le Ofisa o le Komesina o Sulufaiga mo le Tausaga Faaletupe 2021/2022;

4. P.P.2022/2023 Nu.71, Lipoti Faaletausaga a le Faaputugatupe o Faamanuiaga mo Tagata Matutua o Samoa mo le Tausaga Faaletupe 2021/2022;
5. P.P.2022/2023 Nu.72, Lipoti Faaletausaga a le Pulega o Tineimu ma Faalavelave Tutupu Faafuasei a Samoa mo le Tausaga Faaletupe 2021/2022;
6. P.P.2022/2023 Nu.73, Lipoti Faaletausaga a le Matagaluega o Faamasinoga ma Pulega Tau Faamasinoga mo le Tausaga Faaletupe 2020/2021;
7. P.P.2022/2023 Nu.74, Lipoti Faaletausaga a le Matagaluega o Aoga, Taaloga ma Aganuu mo le Tausaga Faaletupe 2021/2022;
8. P.P.2022/2023 Nu.75, Tali a le Malo i le P.P.2022/2023 Nu.12, Lipoti a le Komiti o Tupe Maua ma Tupe Totogi i le P.P.2020/2021 Nu.17, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe 2020/2021;
9. P.P.2022/2023 Nu.76, Tali a le Malo i le P.P.2022/2023 Nu.13, Lipoti a le Komiti o Tupe Maua ma Tupe Totogi i le P.P.2020/2021 Nu.68, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe 2019/2020;
10. P.P.2022/2023 Nu.77, Tali a le Malo i le P.P.2022/2023 Nu.14, Lipoti a le Komiti o Tupe Maua ma Tupe Totogi i le P.P.2020/2021 Nu.78 & P.P.2021/2022 Nu.33, Lipoti o Faamatalaga ma Tala o Tupe a le Faaputugatupe o Faamanuiaga o Tagata Matutua o Samoa mo Tausaga Faaletupe 2019/2020 & 2020/2021;
11. P.P.2022/2023 Nu.78, Tali a le Malo i le P.P.2022/2023 Nu.15, Lipoti a le Komiti o le Vaega Tau le Va Fealoai i le P.P.2020/2021 Nu.8, Lipoti Faaletausaga a le Faalapotopotoga o Taii mo Faalavelave Faafuasei mo le Tausaga Faaletupe 2019/2020;
12. P.P.2022/2023 Nu.79, Tali a le Malo i le P.P.2022/2023 Nu.16, Lipoti a le Komiti o le Vaega Tau le Tamaoaiga i le P.P.2020/2021 Nu.126 & P.P.2021/2022 Nu.41, Lipoti Faaletausaga a le Ofisa o Fuainumera Faamauina mo Tausaga Faaletupe 2019/2020 & 2020/2021;
13. P.P.2022/2023 Nu.80, Tali a le Malo i le P.P.2022/2023 Nu.19, Lipoti a le Komiti o Tupe Maua ma Tupe Totogi i le P.P.2020/2021 Nu.97 & P.P.2021/2022 Nu.62, Lipoti Faaletausaga a le Faalapotopotoga Inisiua Tau Soifua a Samoa mo Tausaga Faaletupe 2019/2020 & 2020/2021;
14. P.P.2022/2023 Nu.81, Tali a le Malo i le P.P.2022/2023 Nu.20, Lipoti a le Komiti o Tupe Maua ma Tupe Totogi i le P.P.2020/2021 Nu.107 & P.P.2021/2022 Nu.43, Lipoti Faaletausaga a le Kamupani o Pulega a le Faaputugatupe Teufaafaigaluega o

- Mavaega Tausi a Samoa mo Tausaga Faaletupe 2019/2020 & 2020/2021;
15. P.P.2020/2023 Nu.82, Tali a le Malo i le P.P.2022/2023 Nu.21, Lipoti a le Komiti o Tupe Maua ma Tupe Totogi i le P.P.2020/2021 Nu.137, Lipoti Faaletausaga a le Matagaluega o Tupe mo le Tausaga Faaletupe 2019/2020;
 16. P.P.2022/2023 Nu.83, Tali a le Malo i le P.P.2022/2023 Nu.35, Lipoti a le Komiti o le Vaega Tau le Va Fealoai i le P.P.2020/2021 Nu.63, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2019/2020;
 17. P.P.2022/2023 Nu.85, Tali a le Malo i le P.P.2022/2023 Nu.36, Lipoti a le Komiti o le Vaega Tau le Va Fealoai i le P.P.2020/2021 Nu.98 & P.P.2021/2022 Nu.53, Lipoti Faaletausaga a le Iunivesite Aoa o Samoa mo Tausaga Faaletupe 2019/2020 & 2020/2021;
 18. P.P.2022/2023 Nu.85, Tali a le Malo i le P.P.2022/2023 Nu.38, Lipoti a le Komiti o le Vaega Tau le Va Fealoai i le P.P.2020/2021 Nu.130 & P.P.2021/2022 Nu.56, Lipoti Faaletausaga a le Matagaluega o Tina ma Tamaitai, Atinae o Nuu ma Afioaga ma Agafesootai mo Tausaga Faaletupe 2019/2020 & 2020/2021;
 19. P.P.2022/2023 Nu.86, Tali a le Malo i le P.P.2022/2023 Nu.39, Lipoti a le Komiti o le Vaega Tau le Va Fealoai i le P.P.2020/2021 Nu.133 & P.P.2021/2022 Nu.15, Lipoti Faaletausaga a le Pulega o Faailoga ma Tusipasi Tauloa a Samoa mo Tausaga Faaletupe 2019/2020 & 2020/2021;
 20. P.P.2022/2023 Nu.87, Tali a le Malo i le P.P.2022/2023 Nu.22, Lipoti a le Komiti o Tupe Maua ma Tupe Totogi i le P.P.2020/2021 Nu.100 & P.P.2021/2022 Nu.22, Lipoti Faaletausaga a le Pulega o Tupe Faava o Malo a Samoa mo Tausaga Faaletupe 2019/2020 & 2020/2021;
 21. P.P.2022/2023 Nu.88, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe 2021/2022;
 22. P.P.2022/2023 Nu.89, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe 2021/2022;
 23. P.P.2022/2023 Nu.90, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2021/2022;
 24. P.P.2022/2023 Nu.128, Lipoti Faaletausaga a le Faaletupe o le Atina A'e o Samoa mo le Tausaga Faaletupe 2021/2022;
 25. P.P.2022/2023 Nu.129, Lipoti Faaletausaga a le Komisi o le Toefuataiga o Tulafono a Samoa mo le Tausaga Faaletupe 2021/2022;
 26. P.P.2022/2023 Nu.130, Lipoti Faaletausaga a le Penisione a le Palemene mo le Tausaga Faaletupe 2021/2022;

27. P.P.2022/2023 Nu.131, Ofisa o le Komisi o Faiga Palota, Lipoti mo le Faiga Palota Laitiiti 2022, Gagaifomauga 2;
28. P.P.2022/2023 Nu.133, Lipoti i Luga o Tulaga Faaletonu mo le Tausaga Faaletupe 2020/2021, Ofisa Suetusi;
29. S.R.2022/2, Tulafono Faatonutonu o le Faafoega o Lafoga (Polokalame Faaletoroni e Mataitu ai Faamatalaga o Oloa Faatau ma Lafoga) 2020.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2022/2023 Nu.91, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.69 & P.P.2021/2022 Nu.12, Lipoti Faaletausaga o le Penisione a le Palemene 2019/2020 & 2020/2021;
2. P.P.2022/2023 Nu.92, Lipoti a le Komiti o Tulafono Tumau Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.75 & P.P.2021/2022 Nu.19, Lipoti Faaletausaga a le Ofisa Tausi Mavaega 2019/2020 & 2020/2021;
3. P.P.2022/2023 Nu.93, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga faale-Faavae i le P.P.2021/2022 Nu.74 & P.P.2021/2022 Nu.21, Lipoti Faaletausaga a le Komisi o Galuega a le Malo 2019/2021 & 2020/2021.
4. P.P.2022/2023 Nu.94, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae o le P.P.2021/2022 Nu.23, Lipoti Faaletausaga a le Ofisa o le Loia Sili 2019/2020.
5. P.P.2022/2023 Nu.95, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2021/2022 Nu.9, Lipoti Faaletausaga a le Matagaluega o Faamasinoga ma le Faafoeina o Tulaga Tau Faamasinoga 2019/2020;
6. P.P. 2022/2023 Nu 96, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2020/2021 Nu 118 & P.P 2021/2022, Nu. 45, Lipoti Faaletausaga a le Komisi o le Toefuataiga o Tulafono a Samoa 2019/2020 & 2020/2021.
7. P.P.2022/2023 Nu. 97, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2021/2022, Nu 47, Lipoti o le Faiga Palota Aoa 2021, Ofisa o le Komisi o Faiga Palota.

8. P.P.2022/2023 Nu 98, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2020/2021 Nu 70 & P.P. 2021/2022 Nu 48, Lipoti Faaletausaga a le Matagaluega o le Palemia ma le Kapeneta 2019/2020 & 2020/2021.
9. P.P.2022/2023 Nu 99, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu. 134 & P.P. 2021/2022 Nu 60, Lipoti Faaletausaga a le Ofisa o le Komisi o Faiga Palota 2019/2020 & 2020/2021.
10. P.P.2022/2023 Nu. 100, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2020/2021 Nu. 135, Lipoti Faaletausaga a le Ofisa o le Failautusi o le Fono Aoaofaitulafono 2019/2020.
11. P.P. 2022/2023 Nu. 101, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le – S.R 2021/2, Tulafono o Teuteuga o le Faavae 2020 – Faasilasilaga o le Amata faamamaluina;
 - (i) S.R 2021/3, Tulafono o Fanua ma Suafa 2020 – Faasilasilaga o le Amata Faamamaluina;
 - (ii) S.R 2021/4, Tulafono o Teuteuga o le Tulafono o le Ofisa Autu o Mataupu Faaletulafono mo Tagata Lautele 2019 – Faasilasilaga o le Amata Faamamaluina
 - (iii) S.R 2021/8, Tulafono o Fanua ma Suafa 2020 – Faasilasilaga o le Amata Faamamaluina (Fuaiupu 43 & 44).
12. P.P. 2022/2023 Nu. 105, Lipoti a le Komiti o le Vaega Tau le Va Fealoai i le P.P. 2022/2023 Nu. 26, Lipoti Faaletausaga a le Faalapotopotoga o Tau mo Faalavelave Faafuasei 2020/2021.
13. P.P. 2022/2023 Nu. 106, Lipoti a le Komiti o le Vaega Tau le Va Fealoai i le P.P. 2020/2021 Nu 71 & P.P. 2021/2022 Nu. 30, Lipoti, Lipoti Faaletausaga a le Matagaluega o Aoga, Taalofa ma Aganuu 2019/2020 & 2020/2021.
14. P.P. 2022/2023 Nu. 107, Lipoti a le Komiti o le Vaega Tau le Va Fealoai i le P.P. 2020/2021 Nu. 125, Lipoti Faaletausaga a le Pulega o Fale ma Malae Taalo a Samoa, 2019/2020.
15. P.P. 2022/2023 Nu. 108, Lipoti a le Komiti o le Vaega Tau le Tamaoaiga i le P.P. 2019/2022 Nu. 16 &, Lipoti Faaletausaga a le Matagaluega o Faatoaga ma Faiga Faiva 2019/2020 & 2020/2021.
16. P.P. 2022/2023 Nu. 109, Lipoti a le Komiti o le Vaega Tau le Tamaoaiga i le P.P. 2020/2021 Nu, 77 & P.P. 2021/2022 Nu. 18, Lipoti Faaletausaga a le Faalapotopotoga o Suesuega Faasaienisi a Samoa 2019/2020 & 2020/2021.
17. P.P. 2022/2023 Nu. 110, Lipoti a le Komiti o le Vaega Tau le Tamaoaiga i le P.P. 2021/2022 Nu. 20, Lipoti Faaletausaga a le Faalapotopotoga o Esetete Tausi o Samoa 2019/2020.

18. P.P. 2022/2023 Nu. 111, Lipoti a le Komiti o le Vaega Tau le Tamaoaiga i le P.P. 2020/2021 Nu 79 & P.P. 2021/2022 Nu 28, Lipoti Faaletausaga a le Faalapotopotoga o Eleele Tumaoti a Samoa 2019/2020 & 2020/2021.
19. P.P. 2022/2023 Nu. 112, Lipoti a le Komiti o le Vaega Tau le Tamaoaiga i le P.P. 2020/2021 Nu. 66 & P.P. 2022/2023 Nu 31, Lipoti Faaletausaga a le Pulega o Tagata Tafafao Maimoa mai Fafō a Samoa 2019/2020 & 2020/2021.
20. P.P.2022/2023 Nu, 113, Lipoti a le Komiti o le Vaega Tau le Tamaoaiga i le P.P. 2022/2023 Nu. 42, Lipoti Faaletausaga a le Matagaluega o Mataupu Tau le Va i Fafō ma Fefaatauaiga 2020/2021.
21. P.P. 2022/2023 Nu. 114, Lipoti a le Komiti o le Vaega Tau le Tamaoaiga i le P.P. 2021/2022 Nu. 50, Lipoti Faaletausaga a le Matagaluega o Pisinisi, ma Alamanuia ma Leipa 2020/2021.
22. P.P. 2022/2023 Nu.115, Lipoti a le Komiti o le Vaega Tau le Tamaoaiga i le P.P Nu. 65 ma le P.P Nu.30 Lipoti Faaletausaga a le Matagaluega o Tiute ma Tupe Maua, 2019/2020 ma le 2020/2021.
23. P.P. 2022/2023 Nu.116, Lipoti a le Komiti o le Vaega o Atinae Eeseese i le P.P. Nu.103 ma le P.P.Nu.26 Lipoti Faaletausaga Pulega o Uafu ma Taulaga 2019/2020 ma le 2020/2021;
24. P.P. 2022/2023 Nu.117, Lipoti a le Komiti o le Vaega o Atinae eeseese i le P.P. Nu.128 ma le P.P Nu.55 Lipoti Faaletausaga a le Faalapotopotoga o Vaa a Samoa, 2019-2020 ma le 2020-2021;
25. P.P. 2022/2023 Nu.118, Lipoti a le Komiti o le Vaega Eeseese i le P.P Nu.138 ma le P.P Nu.32 Lipoti Faaletausaga a le Matagaluega o Fesootaiga ma Faamatalaga Tekonolosi 2019/2020 ma le 2020/2021;
26. P.P. 2022/2023 Nu.119, Lipoti a le Komiti o le Vaega o Atinae Eeseese i le P.P Nu.3 Lipoti Faaletausaga a le Matagaluega o Punaoa Faalenatura ma le Siosiomaga 2019/2020;
27. P.P. 2022/2023 Nu.120, Lipoti a le Komiti o le Vaega o Atinae Eeseese i le P.P Nu.4 ma le P.P Nu.49 Lipoti Faaletausaga a le Faalapotopotoga o Malosi Faaletise 2019-2020 ma le 2020-2021;
28. P.P. 2022/2023 Nu.121, Lipoti a le Komiti o le Vaega o Atinae Eeseese i le P.P Nu. 5 ma le P.P Nu.31 Lipoti Faaletausaga a le Ofisa ole Pule Faatonu 2019/2020 ma le 2020/2021;
29. P.P. 2022/2023 Nu.122, Lipoti a le Komiti o Vaega o Atinae Eeseese i le P.P Nu.6 Faamatalaga o Sini Autu o le Auaunaga o Vaa a Samoa mo le vaitaimi 2021-2024,
30. P.P. 2022/2023 Nu.123, Lipoti a le Komiti o le Vaega o Atinae Eeseese i le P.P Nu.7 ma le P.P Nu.27 Lipoti Faaletausaga a le Auaunaga o Vao Samoa 2019/2020 ma le 2020/2021.

31. P.P. 2022/2023 Nu.124, Lipoti a le Komiti o le Vaega o Atinae Eseese i le P.P. Nu.10 Faamatalaga o Sini Autu o le Faalapotopotoga o le Malosi Faaletise mo le vaitaimi 2021-2024;
 32. P.P. 2022/2023 Nu.125, Lipoti a le Komiti o le Vaega o Atinae Eseese i le P.P. Nu.51 Lipoti Faaletausaga a le Pulega o Suavai 2020-2021;
 33. P.P. 2022/2023 Nu.126, Lipoti a le Komiti o Vaega o Atinae Eseese i le P.P. Nu.54 Lipoti Faaletausaga a le Pulega o Felauaiga i le Laueleele 2020-2021;
 34. P.P. 2022/2023 Nu.127, Lipoti a le Komiti o le Vaega o Atinae Eseese i le P.P. Nu.58 Lipoti Faaletausaga a le Pulega o Malaevaalele 2020-2021.
 35. P.P. 2022/2023 Nu.134, Lipoti a le Komiti o Tulafono Tumau i le P.P. Nu.61 Lipoti o Faiga Palota laiti 2021, Ofisa o le Komisi o Faigapalota.
- Ma le faaaloalo lau Afioga.

LAFO FAATU A TAITAIFONO O KOMITI FAA-PALEMENE

FOFOGA FETALAI: Tulai mai lau Afioga i le Sui Taitaifono o le Komisi Faa-Palemene.

Afioga AUUPAAU MULIPOLA ALOITAFUA MULIPOLA: Lau afioga i le Fofoga Fetalai, e tusa ai ma Tulafono Tumau 170(2)(a)(b) & (c), ou te tolaulauina suafa o sui usufono e pei ona fautuaina e le Komisi Faa-Palemene mo le faamaonia e le Fono Aoaofaitulafono i Komiti Faa-Palemene ua tofia iai:-

1. Komiti o Tulafono Tumau ma Mataupu tau Faiga Palota, Talosaga ma Tofiga Faale-Faavae:-

- Tofa ia FOISALA Lilo Tuu Ioane
 - e suitulaga i le Afioga TEA Tooala Peato ua faamavae mai le Komiti.

2. Komiti o Tupe Maua ma Tupe Totogi:

- Afioga FAAGASEALII Sapoia Feagiai:
 - e suitulaga i le Afioga Hon TAPUNUU Niko Lee Hang ua tuumalo;
- Afioga AIONO Tile Gafa:
 - e suitulaga i le Susuga Hon TUILAEPFA Fatialofa Auelua Sailele Malielegaoi o lo o faamalolo le tumau.

- Afioga ALAIASA Moefaaouo Malagaitutogiai Sepulona Moananu:
 - e suitulaga i le Tofa LEALAILEPULE Rimoni Aiafi, o lo o faamalolo le tumau;
- Afioga AGASEATA Valelio Tanuvasa Peto:
 - e faaatoa i ai le aofaiga e toaiva (9) o sui usufono o le Komiti;

Ma le faaaloalo lau Afioga le Fofoga Fetalai.

Fa'aluaina e le Afioga i le Minisita mo Faatoaga ma Faiga Faiva.

Na faamaonia le lafo.

FOFOGA FETALAI: Tulai mai lau Afioga i le Taitaifono o le Komiti o Tupe Maua ma Tupe Totogi lau Afioga Faleomavaega Titimaea Tafua.

Afioga FALEOMAVAEGA TITIMAEA TAFUA (Taitaifono Komiti o Tupe Maua ma Tupe Totogi): Lau Afioga i le Fofoga Fetalai talu ai e le i maea lelei iloiloga a lenei Komiti i le P.P Nu.46 2021/2022, Faamatalaga o Tupe a le Malo mo le tausaga faaletupe na faaiuina i le aso 30 Iuni 2020, o le ala lea o le tulai atu ma le faaaloalo e faatu le lafo, *Ina ia tusa ai ma aiaiga o Tulafono Tumau 166(2) e talosagaina ai se faatagana a le Fono Aoao Faitulafono mo se taimi faaopopo e faamaea ai iloiloga a lenei Komiti i le Pepa ua taua ma lipoti mai i le Fono Aoao i se aso Fono o le fonotaga ia Ianuari 2023.*

Faaluaina e le Minisita mo Faatoaga ma Faiga Faiva, Minisita mo Galuega, Felauaiga ma Atinae Eseeese ma le Minisita mo Leoleo ma Falepuipui, Pulega o Tinei Mu ma le Komiti o Faalavelave Tutupu Faafuasei.

Na faamaonia le lafo.

Afioga NIUAVA ETI L MALOLO (– Lau Afioga i le Fofoga Fetalai e talu ai e le i maea lelei iloiloga a lenei Komiti i le Tulafono Tau Faaofi o Teuteuga o le Tulafono o Sootaga o Va Lelei o Leipa ma Galuega 2022, ou te tulai ai ma le faaaloalo e faatu le lafo, *Ina ia tusa ai ma aiaiga o Tulafono Tumau 166(2) e talosagaina ai se faatagana a le Fono Aoao Faitulafono mo se taimi faaopopo e faamaea ai iloiloga a lenei Komiti i le Tulafono Tau Faaofi ua taua ma lipoti mai i le Fono Aoao i se aso Fono o le Fonotaga ia Ianuari 2023.*

O le lafo lea lau Afioga i le Fofoga Fetalai.

Faaluaina e le Minisita mo Galuega, Felauaiga ma Atinae Eeseese ma le Minista mo Leoleo ma Falepuipui, Pulega o Tinei Mu ma le Komiti o Faalavelave Tutupu Faafuasei.

Na faamaonia le Lafo.

FOFOGA FETALAI: Tulai mai lau Afioga i le Taitaifono o le Komiti o Tulafono Tumau i Mataupu tau Faiga Palota, Talosaga ma Tofiga Faale-Faavae.

Afioga AUUAPAAU MULIPOLA ALOITAFUA MULIPOLA: Lau Afioga le Fofoga Fetalai, e talu ai o loo molimauina pea le faagasologa o tatou taualumaga nisi o mataupu e le o mafai ona atoatoa i ai le tapenaga o tatou Tulafono Tumau aemaise o ni mataupu fou e le i tupu muamua.

O loo matau foi ma le totoa nisi o mataupu o lo o fai ma maa faafuagalu ua faavaetuia ai le aloaia ma le taualoa o le faagasologa o galuega fai a le tatou Palemene aemaise o le taualoa o le tofi o loo seei ai lau Afioga.

O nisi foi o Mataupu sa o tatou tagofia ma ua fai i ai le faaiuga a lenei Palemene o lo o tatou molimauina lava e moomia ma ua alagataua ona toe teuteu aiaiga o Tulafono Tumau ina ia matua faamautu lelei ma taoto ai i agatonu le faatonufofua mo la tatou galuega. O le agaga laualuga i le vaega lea lau Afioga i le Fofoga Fetalai ia mafai ona malupuipuia le taualoa ma le mamalu o lenei Palemene.

O lea lau Afioga i le Fofoga Fetalai tusa ai ma le Tulafono Tumau 72 ou te faatu le lafo mo le Toe Teuteuina o Tulafono Tumau a le Palemene i vaega ua taua i lalo ma mafuaaga ua moomia ai le toe teuteuina:

1. Tulafono Tumau 22:

2. Tulafono Tumau 187:

Ia teuteuina ina ia atagia ai se aiaiga mautu e taofi ai le faafitauli ua tulai mai pea i sui usufono ua faamalolo le tumau mai galuega a le Fono Aoao Faitulafono ae o loo taufaifai ma faalavelave mai pea i matafaioi tau i le Fofoga Fetalai ma galuega a le Fono Aoao Faitulafono ma Komiti Faa-Palemene lau Afioga. Ia teuteuina ina ia atagia ai le tulaga aloaia e tausia le mamalu o le Palemene i le tulaga o tofiga e taualoa ai le va nonofo o le Fofoga Fetalai ma Vaega Faaupufai ma sui Usufono o le Palemene mo le faagasologa o galulega fai a le Palemene, e le matagofie le tulaga o lo o i ai nei o le faamalolo le tumau e le Fono Aoao Faitulafono o se sui o le Maota lenei ae faaauau pea ona soli aulape o le faaiuga na faia e le Palemene e ala i lona tusi mai pea i le Fofoga Fetalai ma le fesiligia o galuega a Komiti Faa-Palemene.

Mo le alofia o nisi o faafitauli ma le alofia e toe feagai ma le tatou Palemene i suesuega o ni mataupu tau tulaga aloaia o le Fono Aoao Faitulafono e moomia lau Afioga mo le teuteuina o nei Tulafono Tumau ina ia atagia ai le amanaia o aiatatau faale-Faavae a so o se sui usufono o le Palemene lenei.

Ma lou faaaloalo tele.

Faaluaina e le Minisita mo Faatoaga ma Faiga Faiva ma le Minista o le Soifua Maloloina.

Na faamaonia le lafo.

FOFOGA FETALAI: E tusa ai ma aiaiga o Tulafono Tumau 72, e leai se felafolafoaiga e faia i le Lafo ua faamaonia e le Maota, ma o le a tuuina atu loa Teuteuga ua faatu mai i le Komiti o Tulafono Tumau, Matapu Tau Faiga Palota ma Tofiga Faale-Faavae mo le iloiloaina ma toe lipoti mai i le Fono Aoao i se fonotaga o lumanai.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2022/2023 – faitauga muamua

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2022/2023 i lona faitauga muamua.*

Faaluaina e le Minisita mo Faatoaga ma Faiga Faiva, Minisita mo Leoleo ma Falepuipui, Pulega o Tinei Mu ma le Komiti o Faalavelave Tutupu Faafuasei.

Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu.1) 2022/2023 i lona faitauga muamua.

TALA FAATATAU O TUPE FAAOPOOPO (NU.1) 2022/2023 – faataatia i luga o le Laulau-a-Fono

FOFOGA FETALAI: Tulai mai lau Afioga i le Minisita o Tupe.

Na faataatia i luga o le Laulau-a-Fono e le Minisita o Tupe, Hon Mulipola Anarosa Ale Molioo le Tala Faatatau o Tupe Faaopoopo (Nu.1) 2022/2023.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2022/2023 – faitauga faalua**

FOFOGA FETALAI: Tulai mai lau Afioga i le Minisita o Tupe.

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu. 1) 2022/2023 i lona faitauga faalua.*

Faalua e le Minisita mo Faatoaga ma Faiga Faiva ma le Minisita mo Leoleo ma Falepuipui, Pulega o Tinei Mu ma le Komiti o Faalavelave Tutupu Faafuasei.

FOFOGA FETALAI: Ia ua ou manatu o lea ua toe o ni nai minute ia ona tatou malolo lea. Ua manatu ai o le a vavae foe ia ma faataatiaese la tatou galuega mo leni taimi ia ae tatou taliu mai ona faaauau lea o le saunoaga a lau Afioga i le Minisita o Tupe.

O le mea lea, o le a faataatiaese tatou Galuega mo lana malologa masani o le taeao.

Na faataatiaese Taulumaga a le Fono Aoao mo lana malologa masani i le itula e 10:40 i le taeao ma toe amatalia i le itula e 11:22 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Ou te tapa ma le faaaloalo lau Afioga i le Sui Palemia mo le lafo.

LAFO MO LE SUA O ITULA FONO

Afioga Hon TUALA TEVAGA IOSEFO PONIFASIO (Sui Palemia): Lau Afioga i le Fofoga Fetalai, e manatu o lea ua maea ona paleauau la tautega po o le taligasua a le Maota. Faamalo faafetai i lau Afioga ae faapea foi le tatou Ofisa mo le tapenaina o le tatou faamalositino a le Palemene i leni taeao.

Lau Afioga, o lea ua faagasolo le tagofiaina o tatou mataupu tau faaofi e pei ona faamaonia i le tulaga faanatinati. A o le vaiaso faaiu foi lenei o galuega o lenei foi tausaga. Sa tatou auai faatasi i le tatou mafutaga tatalo i le taeao ua sola, e i ai foi le manatu e le o atoatoa lelei le malosi o le tatou Maota. E lelei lava lo tatou sailiili malosi ina ia mafai ona ausia tulaga aupito sili ona lelei o la tatou soalaupulega.

O le ala lea o le tulai atu ma le faaaloalo e faatu le lafo, *Ina ia faataatiaese a tatou Tulafono Tumau 32 mo le suia o a tatou Itula Fono mo le aso Fono lenei e faapea, o le a faaauau pea a tatou Taulumaga seia aulia le itula e 1:00 i le aoauli ona faataatiaese lea mo se malologa ma toe faaauau ai i le itula e 7:00 i le afiafi seia manava i le itula e 11:00 i le po a nanei.*

O le lafo lea ma le faaaloalo lava lau Afioga.

Faaluaina e le Minisita mo Faatoaga ma Faiga Faiva ma le Minisita mo Leoleo, Falepuipui ma le Pulega o Tinei Mu ma le Komiti o Faalavelave Tutupu Faafuasei.

Na faamaonia le lafo.

FOFOGA FETALAI: Ia, o le a faagasolo le tatou galuega e tusa o le lafo ua faamaonia. E faataatiaese tatou Taulumaga mo le malologa o le taeao ua tatou oo mai mo le Saunoaga o le Tala Faatatau Faaopopo (Nu.1) 2022/2023.

Ou te tapa ma le agaga faaaloalo lau Afioga i le Minisita o Tupe mo lau saunoaga.

SAUNOAGA O LE TALA FA'ATATAU FA'APOPO MUAMUA O LE TUPE MO LE TAUSAGA FA'ALETUPE 2022/2023

Lau Afioga i le Fofoga Fetalai ma sui usufono mamalu o le Palemene,

O le viiga ma le faamanu e fo'i pea i le Tama i le Lagi e ou le mana ma le malosi uma lava. Ia tumau pea lona faaneetaga nei e oo i le faavavau. E manatu ua faapopo nei o ni aso ua ae le tuua aso folau. Ua sina foi le galu ma ua ite fanua-a-lalo ina ua gase atu ata o malama i faiva ma tiute o lenei tausaga sa alofaiva i ai si o tatou atunuu mai ona ao seia oo i ona iu. E le i faigofie le tatou savaliga i le amata mai o lenei tausaga i le pipisi o le fa'amai, fesuisuia'i mai o le tau aemaise o le malaga a le maliu ma le oti i so o se itu o le tatou atunuu. E ui a o lea, o le aao laveai o le tatou Tama i le Lagi ua tatou aulia mai ai lenei taeao matagofie.

Lau Afioga i le Fofoga Fetalai,

Ou te tula'i atu ma le agaga fa'aaloalo, e avea ai a'u ma sui o le Malo e tu'uina atu i luma o le Laulau-a-Fono a le Palemene o Samoa, lenei Tala Fa'atautu Fa'aopoopo Muamua o le Tupe mo le Tausaga Fa'aletupe o lo'o fa'agasolo nei 2022/2023.

I lo'u tula'i atu ai i totonu o lenei Maota e tu'uina atu le Tala Fa'atatau Autu o le Tupe 2022/2023 i le masina o Me 2022, o lo'o tapena si o tatou atunu'u e tatala atu ana tuā'oi fa'ava-o-Malo i le lalolagi i le mǎe'a o le lua tausaga o fa'atinoina tapu ma sa ona o puipuiga i le ono oo mai o le fa'amai o le Koviti-19.

E ui i le tele o galuega na fa'atinoina e ofisa ma Matagaluega a le Malo auā le malupuipua o si o tatou atunu'u, sa maitauina le sao mai o le Koviti-19 i o tatou laufanua i le masina o Fepuari 2022. E fa'afetaia ai pea auaunaga sa fa'atinoina e le Matagaluega o le Soifua Maloloina ma ana pa'aga, lea e oo mai ai i lenei taimi o lo'o maitauina lava le vaavaaia lelei o le tulaga i le pepesi ai o lenei fa'amai i totonu o si o tatou atunu'u.

O lenei ua tatou taunu'u mai i le afa o le tausaga fa'aletupe, ma ua tatou molimauina le faatainoina o le tele o faiga fa'avae sa fuafuaina e le Malo. E lē gata mo le tapenaina o le tatou atunu'u mo le toe tatalaina o tatou tuā'oi i le lalolagi, o le fa'afoeina ma le mata'itūina lelei o le pepesi atu o le faamai o le Koviti-19. E tauala atu lea i le faaauuina o polokalame fa'alauiloa, o galuega soosoo tau'au ai ma nuu ma afioaga, faatasi ai ma le lagolagosua a le aufaigaluega a le Soifua Maloloina ma ana paaga, ma ia mautinoa le uuna'ia pea o auaunaga mo le tatou tamāo'aiga.

O le tausaga foi lenei 2022, o lo'o fa'ata'oto ai fuafuaga a le tatou Malo mo le fa'amanatuina o le 60 tausaga, talu ona tuto'atasi Samoa lea sa amatalia mai i le masina o Iuni 2022, ma e fa'amoemoe e fa'amāe'a ia Iuni 2023.

O le masina o Aukuso 2022 lea sa tatala aloa'ia ai tuā'oi fa'ava-o-Malo a Samoa i le lalolagi, ma o le masina foi lea sa fa'amanatuina ai le 60 tausaga talu ona sainia le Feagaiga Fa'a-uō i le va o Niu Sila ma Samoa. O le Afioga i le Tamaitai Palemia ia Jacinda Ardern ma lana aumalaga, o nisi na ulua'i taunu'u mai i laufanua o Samoa ina ua toe tatala femalagaa'iga.

E oo mai i le asō, o lo'o fa'aaauu pea le fa'atinoina o faiga fa'avae ma auaunaga a le Malo, ina ia una'ia ai tagata tafafao maimoa mai fafo, auā le toe si'itia o le vaega ma'oti o turisi. E aofia ai le uuna'ia o galuega fa'alauiloa, toe fa'atinoina o le Teuila, aemaise ai le fa'amanatuina o le 60 tausaga o le tuto'atasi o le Malo o Samoa, lea o lo'o fa'aaauu pea i le atunu'u atoa.

E lē gata i lea, sa fa'atinoina foi e le Malo o Samoa ni faiga fa'avae tau tupe, auā le si'itia o le soifuaga laulelei (Welfare) o tagatanu'u, ma le uuna'ia o le tamāo'aiga e aofia ai vaega nei:

- Fesoasoani mo Tagata e iai Aafiaga Tumau o le Soifua;

- Tu'uitiitia o Fa'amai Lē Pipisi;
- Taofia o le Sauaina o Tinā ma Tamaitai;
- Fesoasoani mo le Vaega Ma'oti o Turisi;
- Fesoasoani mo Pisinisi Laiti; ma
- Polokalame mo le Atina'ega o Itumalo.

Lau Afioga i le Fofoga Fetalai,

Talu mai Iuni 2022, ua tele suiga ua maitauina i le tamāo'aiga o le lalolagi, ma e ono lamatia ai le vaaimamao mo le toe fuata'ina o le tamāo'aiga o Samoa, aemaise ai le maitauina o le si'itia maualuga o le tau o le suauu ma mea taumafa i le lalolagi. O le taofi, afai e lē vave fa'atino e le Malo o Samoa ni faiga fa'avae fa'amāmā avega i le atunu'u, e ono aafia le vaai taula'i mo le fa'atupula'ia o le tamāo'aiga i le lumana'i.

O lenei mau ma le taofi, o lo'o avea ma fa'avae o lenei Tala Fa'atatau Fa'aopoopo Muamua o le Tupe, mo le tausaga fa'aletupe 2022/2023, e pei ona folasia i le laulauafono a le Maota i lenei taeao.

Lau Afioga i le Fofoga Fetalai,

O lo'o aafia i lenei Tala Fa'atatau Fa'aopoopo Muamua o le Tupe 2022/2023 ni faiga fa'avae e fesoasoani atu ai i tagatanu'u aemaise ē e aupito sili ona mā'ale'ale lo latou tamāo'aiga, auā le tali atu ai i aafiaga o le si'itia o le tau o le soifuaga, ma e aafia ai vaega nei:

1. \$50 tala Fa'aopoopoina i le Penisione masani mo masina o Aperila, Me ma Iuni 2023.

O lenei fesoasoani o le a fa'amanuiaina ai uma tagata fai penisione e tusa lea ma le 11,320.

2. \$50 tala Fa'aopoopoina i le Fesoasoani mo Tagata e i ai Aafiaga Tumau o le Soifua mo masina o Aperila ma Me 2023.

E fa'amoemoe e fa'amatu'uina atu lenei fa'amāmāavega mo le to'a 2,017 o tagata o lo'o agavaa i lenei fesoasoani a le Malo.

3. O le aso 23 o Ianuari 2023 o lo'o fa'amoemoe e fa'amatu'uina atu ai le tului faapitoa e 2% e le Fa'aputugā Tupe mo le Lumanai Manuia o Samoa po o le NPF.

O lenei fa'amāmā avega e tusa ma le 19 miliona tala, e fa'aopoopo atu i luga o fa'amanuiaga sa fa'atinoina i le amataga o Iulai ma Tesema 2022, ma o le a fa'amatu'uina atu atoa i le au fai saofaga.

E lē gata i lea, o le a fa'aauau pea ma si'itia galuega a le Malo, auā le mata'itūina lelei o le tau o oloa aemaise mea taumafa i totonu o le atunu'u.

Lau Afioga i le Fofoga Fetalai,

O le Tala Fa'atatau Fa'aopoopo Muamua o le Tupe o lo'o tu'uina atu nei i le Laulau-ā-Fono a le Palemene, sa tu'ufa'atasia e le Matagaluega o Tupe

ma le vaai toto'a, i aafiaga o faiga fa'avae i le tamāo'aiga ma le soifuaga laulelei o le atunu'u, aemaise le nauta'iga ina ia pulea ma mata'itū lelei tupe a le tatou Malo. O lea sa fa'atinoina ai e le Matagaluega o Tupe se iloiloga, auā le taumafai e fetu'una'i ma toe fa'asoa ma fa'asafua nisi o vaegatupe fa'asao, ina ia lē aafia le fa'asiliga o tupe alu i tupe maua, auā le fa'atinoina o atina'e ua ave i ai le fa'amuamua mo lenei tausaga fa'aletupe.

Lau Afioga i le Fofoga Fetalai,

O le aotelega o lenei Tala Fa'atatau Fa'aopoopo Muamua o le Tupe, e fa'amoemoe o le a tu'uitiitia ai le fa'asiliga o tupe alu i tupe maua i le 3.2 pasene, mai i le 3.5 pasene e pei ona i ai i le Tala Fa'atatau o le Tupe Autu. O lenei tu'uitiitiga o lo'o atagia mai ai le fa'aauuina pea o galuega a le Malo, auā le mata'itūina lelei o le fa'aogāina o tupe fa'atatauina, ina ia pulea lelei ma fa'asoasoa tatau.

Tala Fa'atatau Fa'aopoopo Muamua o le Tupe:

Lau Afioga i le Fofoga Fetalai,

O le a ou otoiina atu vaega tāua o lenei Tala Fa'atatau Fa'aopoopo Muamua o le Tupe 2022/2023.

O le aotelega o tupe alu fa'aopoopo o lo'o fa'atalosagaina e tusa ma le \$13,953,091 ma e fa'atupeina lea mai vaega nei:

- \$6,600,000 mai tupe maua fa'aopoopo;
- \$1,686,847 mai tupe fa'ameaalofa mai paaga, o lo'o fa'atupe sa'o ai poloketi mo atina'e;
- \$7,732,878 mai tupe fa'atatauina o le a toe fetu'una'i.

TUPE MAUA FA'APOOPO

O le aotelega o tupe maua fa'aopoopo i lalo o lenei Tala Fa'atatau Fa'aopoopo Muamua o le Tupe, e tusa ma le **\$6,600,000** ma o lo'o au'ili'iliina atu e fa'apea:

- 1. \$1,400,000 mai i le Matagaluega o Tupe.**
O nei vaegatupe o tupe aoina mai i lafoga fa'apitoa mo le saogalemu lea o lo'o totogiina i luga o pasese mo femalagaa'iga i vaalele (Safety and Security Levy);
- 2. \$3,700,000 mai i le Matagaluega o Tiute ma Tupe Maua.**
O nei vaegatupe o lafoga e afua mai i talosaga fa'aopoopo mai Matagaluega a le Malo;
- 3. \$1,500,000 mai i le Matagaluega mo Fa'alapotopotoga a le Malo.**
O nei tupe maua mo le Malo o le si'itaga i tupe, sa fuafuaina e ono maua mai i fa'asiliga o tupe maua a fa'alapotopotoga po'o dividends. O lenei si'itaga e afua mai i iloiloga amata tau su'etusi

mo nei Ofisa, e pei ona fautua mai ai le Matagaluega o Fa'alapotopotoga a le Malo.

Tupe Fa'ameaalofa mai Paaga Masani a le Malo.

E i ai nisi o fesoasoani fa'ameaalofa mai paaga mo atina'e masani a le Malo, o lo'o fa'atupe ai polokalame ma poloketi laiti o lo'o fa'atinoina e Matagaluega ma Ofisa eseese. O le aofa'iga atoa o nei fesoasoani fa'ameaalofa e tusa ma le \$1,686,847.

TUPE FA'ATATAUINA UA FETU'UNA'I

O le aotelega o tupe sa fa'atatauina i le Tala Fa'atatau Autu o le Tupe 2022/2023, e fa'amoemoe o le a toe fetu'una'i e tusa ma le \$7,732,878, ma o lo'o au'ili'iliina atu e fa'apea:

1. \$100,000 mai i le Matagaluega o Feso'ota'iga ma Fa'amatalaga Fa'atekonolosi.

O nei vaegatupe o tupe ua mafai ona fa'asaoina mai i le lisiina o pou o lo'o fa'apipi'ina ai upega feso'ota'i a le Samoa National Broadband Highway;

2. \$7,244,645 mai i le Matagaluega o Tupe.

O nei vaegatupe ua mafai ona fa'asaoina mai i le toe fetu'una'iga ma le toe fa'atalanoaina o sao a le Malo i nisi o ana atina'e tetele, ma o le a ou au'ili'iliina atu:

- **\$150,000 mai i le sao a le Malo i le poloketi mo tane suauu.**

O nei tupe ua mafai ona fa'asaoina e tusa ai ma le fa'atinoina o lenei poloketi i le taimi nei, lea o lo'o faatupeina e le Faalapotopotoga o Atunuu o lo'o gaosiaina le Suāuu (OPEC);

- **\$100,000 mai i le sao a le Malo i le poloketi mo feso'ota'iga.**

E i ai vaega ua fetu'una'i nei i le fa'atinoina o lenei poloketi, ma ua mafai ai ona fa'asaoina nei vaegatupe;

- **\$100,000 mai tupe fa'atatauina mo lafoga i le poloketi mo le toe fausiaina o le Maota o le Palemene.**

E i ai vaega o lenei poloketi ua mafai ona toe fetu'una'i, ma ua fa'asaoina ai loa ma vaegatupe fa'atatauina mo le tologiina o lafoga, e patino i galuega i lalo o lenei atinae;

- **\$50,000 mai le Atina'e o fela'ua'iga i luga o le Lauelele (Land Transport Sector Development).**

E i ai nisi o galuega fa'atino auā le atina'ega o le vaega maoti mo fela'ua'iga ua fa'asee atu nei i le tausaga fa'aletupe fou 2023/2024 ma ua mafai ai ona fa'asaoina nei vaegatupe;

- **\$3,000,000 mo le poloketi o le fa'aleleia o le auala mai Apia e tau i Siumu (Central Cross Island Road).**
O nei foi tupe ua mafai ona fa'asaoina, ona o le fa'asee atu o nisi o galuega fa'atino i le tausaga fa'aletupe o lo'o loma nei;
 - **\$150,000 mai i le sao a le Malo i le atinae mo le fausiaina o le Ofisa o le Fono.**
Talu ai o lo'o fa'agasolo pea tauofoga mo lenei atinae, o lo'o maitauina ai le ono fa'ato'a amata lelei o lenei galuega i le tausaga fa'aletupe o lo'o loma nei, ma ua mafai ai ona toe fetu'una'i nei tupe fa'atatauina;
 - **\$3,300,000 mai i le sao a le Malo i le atinae mo le o le uafu i Matautu.**
O nei vaegatupe fa'asao, e patino i galuega mo le atina'ega o le uafu i Matautu, ma e iai tulaga ua aafia ai le fa'atinoga, ma alagatau ai ona fa'asee atu i le tausaga fa'aletupe fou;
 - **\$223,900 Saofaga a le Malo i le Faletupe mo Atina'e Tetele a Asia.**
Ua mae'a ona totogiina lenei saofaga a le Malo i le faletupe o le Asian Infrastructure Investment Bank, ma ua mafai ai ona fa'asao ma toe fetu'una'i lenei vaegatupe;
 - **\$150,000 sao a le Malo i le atinae mo le fausiaina o nisi o falea'oga fou a le Iunivesite Aoao o Samoa lea o lo'o fa'atupeina e le Malo o Iapani.**
Talu ai o lea fa'ato'a amata tauofoga mo lenei atina'e, o le maitau i lona fa'agasologa, e fa'ato'a mo'omia lenei vaegatupe i le tausaga fa'aletupe o lo'o loma nei;
 - **\$20,745 mo le lisi i le Faletupe o Atina'e a Samoa.**
O lenei vaegatupe sa fa'atatauina mo le lisi o le ofisa o le Minisita Lagolago, lea ua si'itia atu i le Fale o le Malo (FMFMII), ma ua mafai ai ona toe fetu'una'i tupe fa'atatauina.
3. **\$188,233 mai i le Matagaluega o Fa'amasinoga mo le Fa'afocina o Tulaga tau Fa'amasinoga.**
O nei vaegatupe ua mafai ona fa'asaoina mai i totogi o avanoa faigaluega na tuai ona fa'atumuina, ma ua auina mai e toe fetu'una'i auā talosaga fa'aopoopo a le Matagaluega.
4. **\$200,000 mai i le Matagaluega o Puna'oa Fa'anatura ma le Siosiomaga.**
O lenei vaegatupe sa fa'atatauina lea mo le vaavaaia ma le tausaiaina o le malae i Matagalalua (Friendship Park), lea ua fa'asee atu i lalo o le Pulega o Tagata Tafafao Maimoa mai Fafu, ma ua mafai ai loa ona toe fetu'una'i i talosga fa'aopoopo a le Matagaluega.

TUPE ALU FA'AOPOOPO

Lau Afioga ile Fofoga Fetalai,

E pei ona ou ta'ua muamua, o le aotelega o talosaga fa'aopoopo mo lenei Tala Fa'atatau Fa'aopoopo Muamua o le Tupe, e tusa ma le \$13,953,091, ma o le a ou au'ili'iliina atu:

Tupe Alu Fa'aletulafono:

O le a si'itia i le \$4,000,000 tupe fa'atatauina mo tupe alu fa'aletulafono. E \$2,000,000 o le a fa'aopoopoina mo Lafoga mo Tupe Maua toe Fa'aolaina atu, ma le \$2,000,000 mo Lafoga i luga o Oloa ma Auaunaga toe Fa'aolaina atu. O nei tupe fa'aopoopo, o lo'o fua lea i luga o talosaga ua taunu'u mai mo le iloiloga a le Matagaluega o Tiute ma Tupe Maua.

Polokalame o Tupe Alu a Matagaluega:

O le aotelega o talosaga fa'aopoopo mo Polokalame fa'atinoina e Matagaluega e tusa ma le \$8,266,244 ma e aofia ai vaega nei:

1. \$103,545 mo le Matagaluega o Pisinisi, Alamanuia ma Leipa.

O lenei vaegatupe e fa'atupe ai avanoa faigaluega fou, e aofia ai le tagata fa'aopoopo mo le Vaega o lo'o vaavaaia Galuega Fa'avaitaimi i Niu Sila, fa'apea le avanoa fou mo le vaega e fa'afoeina polokalame mo tagata faigaluega i totonu o le Matagaluega;

2. \$100,000 mo le Matagaluega o Feso'ota'iga ma Fa'amatalaga Fa'atekonolosi.

O nei vaegatupe e fa'atupe ai nisi o fonotaga, o lo'o fuafuaina mo le auai atu ai o le Afioga i le Minisita ma le Pule Sili ile fa'aiuga o le tausaga fa'aletupe;

3. \$7,620,050 mo le Matagaluega o Tupe.

O nei vaegatupe o lo'o fa'atalosagaina mo galuega fa'aopoopo a le Matagaluega e aofia ai vaega nei:

- **\$150,000 mo le sueina o tusi mo nei atinae.**

O lenei galuega fa'atino o se tasi lea o sao a le Malo i ana atina'e, ma ua amata nei ona fa'agasolo mo nisi o atinae ua mae'a;

- **\$1,342,350 mo le si'itia o le saofaga a le Malo o Samoa mo atina'e a le Faletupe o Asia ma le Faletupe a le Lalolagi.**

O lenei saofaga fa'aopoopo, e si'itia ai le saofaga a Samoa i le Fa'alapotopotoga fa'apitoa a le Faletupe o le Lalolagi, ua ta'ua o le IFC;

- **\$1,000,000 mo le totogiina o tiute ma le \$2,000,000 mo le totogiina o lafoga VAGST, e patino i poloketi ma polokalame o fa'atupeina e paaga masani mo atina'e a le Malo.**

Mo le silafia e sui usufono mamalu o le Palemene, o le sao lea a le Malo i le faatinoina o atinae e faatupeina mai e tatou paaga masani, o le totogiina lea o tiute ma lafoga VAGST i luga o oloa auina mai i fafo;

- **\$1,000,000 mo le Pulega o Malae Vaalele.**
O leni vaegatupe, o lo'o fa'amoemoe e fa'alelei ai masini ma meafaigaluega, auā le fa'afoeina o auunaga masani a le Pulega o Malae Vaalele (groundhandling services);
- **\$501,700 e fa'aopoopo i le fesoasoani a le Malo mo tagatanu'u e i ai Aafiaga Tumau o le Soifua (Disability Benefits).**

O leni vaegatupe, e lē gata e fa'atupe ai le fa'atupula'ia o tagatanu'u resitalaina mo leni fesoasoani, ae e fa'amoemoe foi e fa'atupe ai se fa'aopoopoga e ta'i \$50tala mo masina e lua, e pei ona ta'ua muamua;

- **\$1,626,000 e fa'aopoopo i le Penisione mo Tagata Matutua.**

E pei foi ona ta'ua, o leni vaegatupe o lo'o fa'amoemoe e fa'atupe ai se fa'aopoopoga e tai \$50tala mo masina e tolu, i le fa'aiuga o le tausaga fa'aletupe o lo'o fa'agasolo nei 2022/2023, mo penisione o tagata matutua, auā se fa'amāmāavega i le tau o le soifuaga.

4. **\$100,000 mo le Matagaluega o le Va-i-Fafo ma Fefa'atauaiga.**
O leni vaegatupe, e fa'amoemoe e fa'atupe ai le auai atu o le Afioga i le Tamaitai Palemia ma le Pule Sili, i nisi o fonotaga fuafuaina mo le afa mulimuli o le tausaga fa'aletupe o lo'o fa'agasolo nei;
5. **\$188,233 mo le Matagaluega o Fa'amasinoga ma le Fa'afoeina o Tulaga Tau Fa'amasinoga.**
O leni vaegatupe, o lo'o fa'atalosaga e fa'atauina ai se masini fa'atekonolosi (server), auā fa'amaumauga ma fesootaiga a le Matagaluega;
6. **\$154,416 mo le Matagaluega o Punaoa Fa'anatura ma le Siosiomaga.**
O nei tupe fa'atalosagaina, e mō avanoa faigaluega fou a le Matagaluega o lo'o mo'omia tele mo nisi o ana auunaga, ma ua mǎe'a foi ona fa'amaonia e le Komisi mo Tagata Faigaluega a le Malo.

POLOKALAME FA'AOPOPO MO ATINA'E

E \$1,686,847 le aofa'iga o ni polokalame fou fa'atupeina sa'o e paaga masani mo atina'e a le Malo o Samoa e patino lea i vaega ma'oti nei:

- \$234,900 mo le Vaega Ma'oti o Atina'e o Nu'u ma Alaalafaga, ma le Soifuaga Lautele;
- \$87,772 mo le Vaega Ma'oti o Aoga;
- \$97,500 mo le Vaega Ma'oti o Tulafono ma Fa'amasinoga;
- \$192,554 mo le Vaega Ma'oti o Auaunaga a le Malo;
- \$478,391 mo le Vaega Ma'oti o Fa'ato'aga ma Faiga Faiva;
- \$135,322 mo le Vaega Ma'oti o Fefa'ataua'iga ma Alamanuia;
- \$460,408 mo le Vaega Ma'oti o Tupe.

TUPE FESOASOANI TU'USA'O MAI MO LE FA'ATUPEINA O LE TALA ILE TUPE

Lau Afioa i le Fofoga Fetalai,

O lo'o aofia foi i totonu o lenei Tala Fa'atatau Fa'aopoopo Muamua o le Tupe 2022/2023, se fa'aopoopoga i tupe tu'usa'o fa'ameaalofa mai i nisi o a tatou paaga, auā le fa'atupeina lea o le Tala ile Tupe, po'o "Budget Support". E pei ona silafia o nei vaegatupe e fa'amatu'uina mai e a tatou paaga, pe a mae'a ona iloilo le fa'atinoina lelei o polokalame na folasia, ma malilie autasi ai le Malo o Samoa ma ana paaga masani mo atina'e, ma e fua foi i le mata'itūina ma le puleaina lelei o tupe a le Malo. O nei fesoasoani fa'aopoopo ua mafai ona fa'amatu'uina mai e fa'atinoina ai faiga fa'avae, e tali atu ai i le si'itia o le tau o le soifuaga, aemaise ai le tu'uitiitia o le fa'asiliga o tupe alu, nai lo'o tupe maua i le tala o le tupe.

O le aofa'iga o nei fesoasoani tu'usa'o e **\$44,060,000** ma o lo'o tu'uvaevaeina fa'apea:

1. **\$20,000,000 (lua sefulu miliona tala Ausetalia) mai i le Malo o Ausetalia e tusa lea ma le \$36,000,000 tala Samoa**, ma o lenei fesoasoani o lo'o fa'amatu'uina mai fa'ameaalofa;
2. **\$3,100,000 (tolu tesi ma le tasi miliona tala Amerika) mai i le Faletupe mo Atina'e a Asia, e tusa lea ma le \$8,060,000 tala Samoa**. O lenei fesoasoani tu'usa'o o le vaega mulimuli o le fesoasoani a le Faletupe mo Atina'e a Asia, sa fa'amaonia i le tausaga 2017 (i le taimi o lo'o agava'a Samoa i le lima sefulu pasene o tupe fa'ameaalofa, ma le lima sefulu pasene o tupe nōnō, mai le fa'aputugatupe a le Asian Development Fund), ma o le vaega o le tupe fa'ameaalofa o lea sa fa'amatu'uina mai ia Aperila 2020, e tali atu ai i le Koviti-19.

Upu Fa'aiu:

Lau Afioga i le Fofoga Fetalai ma le Mamalu o le Fono Aoa,

O le Tala Fa'atatau o le Tupe mo le tausaga fa'aletupe o lo'o fa'agasolo nei 2022/2023, sa tu'ufa'atasia ma o lo'o fa'atinoina ma le naunauta'iga, ina ia toe fatufatu ma fa'ama'ite ai le tamāo'aiga o si o tatou atunu'u, i lenei vaitau. O le a lagolago tele e le Tala Fa'atatau Fa'aopopo Muamua o le Tupe nei galuega fa'ama'ite, e tauala atu lea i le fa'avaeina o ni alafua e faatino, auā le tali atu i aafiaga ona o le fa'atupula'ia o le tau o le soifuaga.

Ou te fiasia e fa'ailoa atu, o lo'o sologa lelei pea le fa'atinoina o faiga fa'avae uma, e pei ona fuafuaina mo lenei tausaga fa'aletupe, ma o lo'o fa'amauina foi le tulaga lelei o tupe a le Malo. O le a galulue so'oso'o tau'au le Matagaluega o Tupe ma ana paaga, ina ia ausia taunu'uga mo'omia, a'o lē i mae'a lenei tausaga.

Lau Afioga i le Fofoga Fetalai,

O lo'o mata'itū lelei foi e le Matagaluega o Tupe faatasi ai ma ana paaga o le vaega maoti o tupe, le fesuia'iga i le tamāo'aiga o le lalolagi, ina ia lava tapena le Malo e tali atu i ni tulaga e ono lamatia ai le toe fuata'ina o si o tatou tamāo'aiga. O nei galuega uma o lo'o atagia mai ai le nofo mataala o le Malo, auā le fa'amausalīina o le si'itia pea o le soifuaga laulelei o tagatanu'u uma o Samoa.

E fia fa'aleoina le agaga fa'afetai tele i tatou paaga masani mo atina'e, fa'alapotopotoga tuma'oti, vaega tuma'oti ma pisinisi, fa'atasi ai ma tatou nu'u ma afioaga, mo lā outou lagolagosua faifaipea i galuega fai a le tatou Malo, auā le taumafai ina ia siitia le auunaga i le mamalu o le atunu'u.

E ao foi ona tatou patipatia le taumafaiga maoa'e na ausia e le tatou Toa Samoa i le Ipu o le Lalolagi o le Lakapi Liki sa faia i Lonetona lea sa ou auai, aemaise ai foi le siamupini ai o le Au Taitoafitu a Samoa i le ta'amilosaga i Aferika i Saute.

Lau Afioga i le Fofoga Fetalai, fa'apea Sui Usufono o le Palemene,

Avea foi lenei avanoa tāua e fai ai a'u ma Sui o le Malo, e momoli atu ai mo'omo'oga alofa ma fa'amanuiaga i lau Afioga i le Fofoga Fetalai, le mamalu o le Palemene nei, aemaise le tapua'iga a Samoa atoa, mo se Kerisimasi fiasia ma le saogālemū. Ia alofa mai pea lo tatou Tapa'au Sili i le Lagi, fale i ona Aao alofa si o tatou Atunu'u Pele, a'o tatou sauni atu ai e fa'afeiloa'i le pepe o le Kerisimasi. Ia fa'amanuia mai foi le Atua, ia momoli atu lo outou Soifua auā se tausaga fou manuia ma le saogalēmū, mo tatou uma.

Soifua ma ia Manuia!

Na faaaliala le agaga fiafia o le Maota i le patipati o latou aao i le maea ai o le Saunoaga a le Minisita o Tupe i le Tala Faatatau Faaopoopo o le Tupe (Nu.1) 2022/2023.

FOFOGA FETALAI: Malo faafetai mo le saunoaga maeaea ma malamalama lelei a lau Afioga i le Minisita o Tupe. Malo lava mo le galuega a le Matagaluega o Tupe.

E tusa ai ma le Tulafono Tumau 133, o le a tolopo felafolafoaiga i le Tulafono Tau Faaofi o le Faatatauina o Tupe Faaopoopo (Nu.1) 2022/2023 e le itiiit if oi le 14 aso, a o tuuina atu le Tala Faatatau o Tupe Faaopoopo (Nu.1) 2022/2023 mo le iloiloga a le Komiti o Tupe Maua ma Tupe Totogi, ma toe lipoti mai i le Fono Aoao i le fonotaga o lumanai.

TULAFONO TAU FAAOFI O TEUTEUGA O LE TULAFONO O LE FAASOLOGA O TIUTE 2022 – faitauga muamua

FOFOGA FETALAI: Ou te tapa lau Afioga i le Sui Palemia, o le Minisita foi lea o Tiute ma Tupe Maua.

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai ou te tu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faasologa o Tiute 2022 i lona faitauga muamua.*

Faaluaina e le Minisita mo Faatoaga ma Faiga Faiva ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faasologa o Tiute 2022 i lona faitauga muamua.

TULAFONO TAU FAAOFI O TEUTEUGA O LE TULAFONO O FANUA MA SUAFA 2022 – faitauga muamua

FOFOGA FETALAI: Ou te tapa lau Afioga i le Minisita mo Faamasinoga ma Pulega Tau Faamasinoga.

Tofa Hon MATAMUA SEUMANU VASATI SILI PULUFANA (Minisita mo Faamasinoga ma Pulega Tau Faamasinoga): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fania ma Suafa 2022 i lona faitauga muamua.*

Faaluaina e le Minisita mo Faatoaga ma Faiga Faiva ma le Minisita mo Leoleo, Falepuipui ma le Tinei Mu.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fanua ma Suafa 2022 i lona faitauga muamua.

TULAFONO TAU FAAOFI O TEUTEUGA O LE TULAFONO O LE FAASOLOGA O TIUTE 2022 – faitauga faalua

FOFOGA FETALAI: Talu ai ua ou taulimaina nei le Tusi Faamaonia o le Tulaga Faanatinati ua maea ona sainia e le Taitai o le Maota i lenei Tulafono Tau Faaofi, o lea o le a sagai atu loa le Fono Aoa mo le faitauga faalua ma faagasolo ai lava seia faitauina faatolu.

Ou te tapa lau Afioga i le Sui Palemia o le Minisita foi lea o le Matagaluega o Tiute ma Tupe Maua.

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faasologa o Tiute 2022 i lona faitauga faalua ma ou te fia tautala faamalamalama i ai.*

Faaluaina e le Minisita mo Faatoaga ma Faiga Faiva, Minisita mo le Soifua Maloloina ma le Minisita mo Leoleo, Falepuipui ma Tinei Mu.

FOFOGA FETALAI: Tulai mai lau Afioga i le Sui Palemia, o le Minisita foi lea o Tiute ma Tupe Maua mo lau saunoaga faamalamalama.

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai faapea foi le maualuga o le tatou Palemene, e tumau pea le viiga o le Atua pei ona tatou i ai i le taeo nei. E momoli atu ai le agaga o le faafetai i lau Afioga i le Fofoga Fetalai e tusa ai foi ma le tofa ua ae ina ia maua se tatou mafutaga tatalo i lenei taeo aua lava le viiga o le Atua. Ou te tulai atu e ao pea ona faamanino nisi o vaega ua ala ai ona tuuina atu lenei iloiloga o le Tulafono Tau Faaofi mo le silafia aemaise foi le pasiaina e le Palemene mamalu. E fia muai faailoa ma faamanino foi afuaga o lenei iloiloga.

O lenei iloiloga o se galuega faaauau pea a le Matagaluega o Tiute ma Tupe Maua na amata mai lava i le tausaga e 2019 a o i ai le faigamalo a le HRPP seia oo mai lava i lenei pepa, o ni faiga faavae nei na amatalia i le Paeaiiga ua mavae ma o lo o faaauau lava mai letaimi nei. E i ai vaega na faatuatuai ai lenei iloiloga ma faatelegese ai foi.

Muamua, ia, pei ona silafia o le faama'i o le misela na aafia ai si o tatou atunuu i le tau faaiuiu ai lea o le tausaga 2019.

Lona lua o le amatalia o sa ma vavao i le tele o atunuu i le faamai o le Koviti-19 i le 2020 faapea foi ma faasolo mai ai i le faiga palota e pei ona tatou i ai i le tausaga 2021. Ma e manatu o lena taimi sa faapea ai ona toe faataatia lenei Tulafono ina ua faatino le tele o Tulafono sa tau pasia i lena taimi ae le i faatinoina le faiga palota i le 2021.

O le iloiloga ma le lauiluina o le tau o tiute ma lafoga, e le o se galuega e fou nei. O nisi o faiga faavae ma suiga e pei ona tuuina atu mo se faaiuga a le Palemene, o ni vaega lea ua maea ona malilie i ai le Malo i tausaga ua mavae e ala lea i le JAPAM po o le Joint Action Policy Matrix. O lona uiga o se tuufaatasiga lea o faiga faavae ma suiga ua maea ona sainilima i ai le Malo mai lava i tausaga ua mavae, ina ia mafai ai ona faamatuu mai le fesoasoani a le Faletupe o le Lalolagi i la tatou Tala Faatatau o le Tupe i Tausaga taitasi.

O le fetuunaiga o tau o tiute ma lafoga, na afua ma faatatau i vaega tetele e 3.

O le vaega muamua, o le taumafaiga lea a le Malo ina ia tetee atu i faamai le pipisi, e ala lea i le siitia o tiute ma lafoga e faaee i luga o oloa po o oloa o meataumafa e tele ai le gao, masima ma le suka. O lo o tuuina mai i le suiga nei ua faataatia e le Maota le faaee ma le siitia o le tau o tiute ma lafoga i aano o manifasi po o vaega o aano o manifasi e tele ai le gao, faapea foi ma vaiinu taumafa e tele ai le suka, e pei o faguinu suamalie o lo o faaulufaleina mai atoa ai ma oloa nei o lo o gaosia i Samoa nei.

O lo o i ai foi suiga e pau ai le tau o le tiute ma lafoga i fualaau faisua e pei ona i ai le suiga o le tau ua maea ona pasia i tiute ma lafoga e faaee i luga o tau o fualaauaina sa faatinoina i le tausaga 2020/2020.

O se tasi o vaega taua o lenei iloiloa, o le toe fetuunai lea o nisi o a tatou meataumafa ina ia mafai ona vaevaeina e tusa ai ma le faatulagaina faale-Soifua Maloloina. O lo o aafia i lenei suiga le toe vaevaeina o le aano o le mamoe se i tulou, ina ia mafai ona tuueseeseina le vaega e tele ai le gao ma vaega e aoga ma lelei mo le fofoga taumafa o le atunuu.

O lona lua, o se taumafaiga foi a le Malo ina ia uunaia tatou pisinisi i le suiga o le faatinoga o galuega, ua aapa ai le tatou Malo ina ia i ai se tau faamamaavega o tiute i le tau o masini komepiuta ma telefoni feaveai e faaogaina mo le pisinisi. O le agaga ma le faamoemoe ina ia uunaia atinae o pisinisi i samoa. Ua i ai foi suiga ian ia mafai ona mautinoa pea le i ai o avanoa tutusa mo a tatou pisinisi laiti e atiae ai.

O lona tolu o vaega, i lo tatou i ai pea o se sui o le WTO po o le Faalapotopotoga o Fefaatauaiga a le Lalolagi. E i ai aiaiga i le tau o tiute faatulagaina i le maualuga e faaee i luga o oloa, po o le tau lea o lo o taua o le WTO bound rate, po o le tau lea e le mafai ona faasilia. O nisi o a tatou oloa ua fetuunai tiute ina ia mafai ona ogatasi, ma tau maualuga ua

faatulagaina mai. O le Faalapotopotoga o Fefaatauaiga a le Lalolagi, o latou nei o lo o faatulagaina le tau o oloa, i faiga fesootea pea ma le tatou Matagaluega, ia faapea foi nisi o le Matagaluega o Tiute i isi atunuu o le lalolagi. O le ala lea, a silasila i nisi o a tatou suiga o mea taumafa ua i ai i le aafiaga i le soifua maloloina, o lo o faatumauina pea le tau o tiute ma lafoga. Ma ua see ese isi vaega o le tau o tiute sa i ai i le lafoga o le excise po o le lafoga faaopopo lea i luga o le lafoga ua uma ona autasi i ai lo tatou Malo faapea foi le Faalapotopotoga o Fefaatauaiga a le Lalolagi.

O lo ua manino le faavasegaina o oloa le taua o lenei galuega ma le iloiloga, ina ia mautinoa le soifua manuia lelei o si o tatou atunuu. O le soifua maloloina o tagata lautele, o le uunaia o le atinae o pisinisi, aemaise o le vanonofo ai ma tatou paaga faava-o-Malo, faapea ma le mulimulitaia pea o aiaiga o feagaiga ua maea ona saina aao i ai lo tatou Malo, e taua le silafia o lenei iloiloga e faaauau pea, ina ia silasila totoa le Matagaluega i nisi o faiga faavae, e fesoasoani i le atinae o si o tatou atunuu, i ona vaega uma.

Lau Afioga i le Fofoga Fetalai, o le taua lea o lenei Tulafono. E tuuina atu ma le faaaloalo tele i le Fono Faitulafono a le Malo mo le latou felafolafoaiga ma finagalo foi e faaalua i ai. O le agaga lea ma le faafetai.

FOFOGA FETALAI: Ua faamalo saunoa i lau Afioga i le Sui Palemia. Ua manino ma malamalama lau saunoaga e faatatau i le Tulafono Tau Faaofi, malo faafetai.

O le avanoa lenei mo ni sui usufono e fia saunoa i le tatou Tulafono Tau Faaofi. O lea foi na tatou feiloai i le aso ananafi, ma talanoaina foi nei lava Tulafono Tau Faaofi. A o le avanoa lenei e tuuina atu i sui usufono mamalu, ina ia saunoa i lona faitauga faalua i Faiga Faavae o lenei Tulafono. O le avanoa lenei.

O lea ua matau atu o lea ua tulai mai le sui usufono mo Anoamaa 2, lau Afioga Hon Lauofo Fonotoe, o lou avanoa lenei.

Tofa Hon LAUOFO FONOTOE NUAFESILI PIERRE LAUOFO: Ua faafetai mo le avanoa lau Afioga i le Fofoga Fetalai, taumafai atu ai foi nai motugaafa puupuu e tusa ai foi ma le Tulafono Tau Faaofi. E manatu o lea ua maea i le taeao ua sola, ona tala fusi o le tautiaga aua lo tatou vatapuia ma le Atua Soifua. E manatu o lea e le toe afea i sau tala, malo faafetai i lau Afioga mo le talosaga i le taimi ua sola.

E manatu foi o paia o le atunuu e taoto ae o se alaoo, ia o paia ma mamalu e le avea e tumau. E manatu o le a faataalolo.

Ae agai tonu sau faamatalaga e tusa ai ma le Tulafono Tau Faaofi lenei, po o se Tulafono Toe Teuteu. E faafetai mo le saunoaga matagofie ma le saunoaga malamalama a lau Afioga i le Sui Palemia. O lea ua maua le anoliu o le mataupu, o se fesoasoani i lo tatou atunuu, e le gata i le tulaga o

le tuutiitia o faamai le pipisi po o NCDs, faapea foi le tuumauualaloina o nisi vaega o pasene o tiute ae siitia nisi vaega.

O lau la matau i le vaega muamua e foliga mai o lea o le a sii i luga le tau o nisi o oloa taumafa. Ae e le o natia i le faafofoga a le atunuu le tulaga i le maualuga o le tau o le soifuaga o lo o i ai, le taugata o le tau o oloa lea foi sa faapena ona afea i le saunoaga a le Minisita o Tupe, faatoa mavae atu nei, e tusa ai ma le tala faaopoopo o le tupe. O le tulaga lava ia e feagai pea ma tatou, o luitau e feagai pea ma tatou i aso uma. O lea e pei ona matau atu, e agai le siitia o pasene o tiute. E le gata i le tiute o le import duty po o le tariff ae faapea o lea ua faaopoopo le excise tax, aemaise lava la i aano o manifasi. O lea ua matauina, ua faaopoopo le tiute i le taumafa lea o le tapuvae puua sei tulou, po o le pig trotters, e pei ona aumai i le pepa ma le Tulafono a le Minisita po o le Sui Palemia. O lea ua siitia mai i le 8%, sii i le 20%, tiute fou 15% ma le excise tax e faaopoopo i ai e 5%. O lona uiga o le a sii le pasene o tiute o le tapuvae puua mai le 8% i le 20%.

Atonu o le auga lea o le taumafai e tuutuu i luga le tau o taumafa ia o lo o faatupulaia ai le NCD po o faamai le pipisi, atonu o le auga lea. Ae manatu foi i le isi itu, e pei o nai taumafa taugofie ia o lo o tua i ai le limavaivai ma le le tagolima, nai meaai ia faapea. O lea foi e pei ona matauina ia isi ituaiga aano o manifasi, o lo o pau i lalo pe 5% le pau, faapau mai i le 20% i le 15%, ona o le faamoemoe lava lea e tasi. O lea la e matauina i le tulaga tau mamoe, o le mamoe lea e tau o le vae mamoe po o le lamb shank, o lea ua 15%, e 20% o lo o i ai nei, ae o lea o le a faapau i le 10% ma le 5% o le excise tax, ona atoa ai lea o le 15%, maua sina faamama avega. A o taumafa ia o le lamb shank e fai lava si taugata, e masalo po o le \$27 i le kilokalama. Sosoo ane ai ma le taumafa lea o le ua mamoe. O lea ou te vaavaai atu po o le \$16 i le kilokalama i le ua mamoe. Ia faasolo ifo i lalo i le lamb rack, o lea e faa-Samoa mai i i, o le fatafata mamoe. A o lau faatauga sa faatau ai ia taumafa ia o le lamb rack i le faleoloa i le Aso Toonai na tea nei, aua foi mea a si a matou ekalesia, e tau o le pau mamoe, lea o lo o faatau, o lea e silafia e le atunuu, o le pau mamoe. O le matou faatau e \$8 i le kilokalama, e taugofie, e ese le taugofie. E pei o nai mea ia e tua i ai le au limavaivai, e maua ai se taumafa.

O lau la tala lea e fai atu, o le tai 20% lea e i ai uma ia taumafa ia e tolu, o lea ua aumai o le a tuu i lalo i le 10% i le tiute lea po o le tariff. O lona uiga o le a totoe ai le 10%, ae faaopoopo lea i ai o le 5% o le excise tax, ona 15% ai lea. Toe faaopoopo i ai ma le GST e 15%, ona 30% ai lea. O lona uiga o le tala lea e tau fai atu, o lea lava e maualuga, taugata lava le tau o le soifuaga o lo o i ai nei, 30%. Ae a silasila la i le tau o oloa nei e pei ona ou avatu, aua o le mafuaaga lea na ou avatu ai le tau o le kilo e tasi. Aua i lou talitonuga ma le manatu, e tatau foi ona eseese ia le pasene o tiute, e le tatau ona lanutasia uma ia pasene o tiute ia o oloa ia e tolu, e tatau ona eseese aua e fua i le tau. Afai e taugofie e \$8 i le kilo le pau mamoe, e tatau

foi ona pau te isi i lalo, e le tatau ona 30%. A tuu atu i le lamb shank po o le vae mamoe lea e \$27 i le kilo, e tatau ona tuutuu foi i tulaga faapena, ia pasene nei. Aua o lea e matau atu, o lea e tutusa uma lava pasene e pei ona aumai. O lea foi la e pei ona matauina, o oloa ia o lo o i ai le tulaga o le suka, po o oloa suamalie, o lo o siitia le tulaga lea mai le 8%, ona sii lea i luga i le 18%. O isi oloa ia suamalie, sii mai i le 20% i le 25%.

Lau Afioga i le Fofoga Fetalai, e le faaumiumia sau faamatalaga, e pei o le ata lea ma le mea o lo o taumafai atu ai, o lo o siitia le tulaga o isi oloa, lea o lo o taugata i le taimi nei, ae o le aua siitia le pasene o tiute. O lona uiga o le a atili ona taugata. A o oloa ia o lo o maualuga feololo ia a latou pasene, o lea ua tuutuu te isi i lalo, ae le o lava, e le o lava, ina ia feololo ai se faamama avega mo le mamalu o le atunuu, o oloa ia taumafa o aano o manufasi.

E faapea foi la pe a silasila i tulaga o telefoni ma masini ia e pei ona taua i le saunoaga faamalamalama a le Sui Palemia. O lea ua faasolo agai i lalo ia le tiute o telefoni ma laptops ma computer. O se tulaga lelei mo pisinisi lelei foi mo aoga. Ae pau lava lea o le fautuaga, ia aua nei pa le tulaga o aoaoga e fai i fanau, i le faaogaseseina o tekonolosi nei. E tasi ia tekonolosi o lo o tulai mai ai le tele o faafitauli. E tupu ai ma le solitulafono, tupu ai ma isi mau faafitauli, faaopoopo ai foi i le taugata o taumafaiga a le Malo e foia ia nei mau faafitauli e tele. E faapea se manatu i pasene ia i mea o taumafa, aua e le o le taimi muamua lenei e aumai ai se Tulafono Teuteu, e sii ai le pasene o taumafa o lea e faapea e aafia ai pe maua ai tagata i le NCD, o faamai le pipisi.

FOFOGA FETALAI: Toe tasi le minute o le sui usufono.

Tofa Hon LAUOFO FONOTOE NUAFESILI PIERRE LAUOFO: E i ai le mai suka, e i ai le totomauuluga. O lea foi ua toe aumai le tulaga lea, a o lea ou te manatua, sa ou lauga ai foi i le Tulafono faapea na aumai i nisi foi vaitaimi, i isi tatou fonotaga. E ave pea le faamamafa i tulaga o aoaoga, o le education o le mea e sili ona taua. Aua tato te fiu e sii pasene ma soona taugata ai le tau o le soifuaga. Ae a le lelei aoaoga ma polokalame e aoa ai le mamalu o le atunuu i aafiaga o mea nei, tatou te fiu lava e sii, e alualu lava i luga ma faatupulaia ia i latou e gasegase, e mafua mai i oloa taumafa nei.

Lau Afioga i le Fofoga Fetalai, o nai motugaafa na, e pei ona ou fai atu, e le umi foi sau faamatalaga, i le tulaga o le Tulafono Tau Faaofi e pei ona aumai.

Ia manuia le Fono.

FOFOGA FETALAI: Malo saunoa. Ia tulai mai le sui usufono mo Satupaitea. Lau Afioga Lautafi.

Afioga Hon LAUTAFI FIO SELAFI PURCELL (Satupaitea): Faafetai i lau afioga i le Fofoga Fetalai mo le avanoa o lenei sui usufono. Ia ae le i faia foi se tala e muamua lava ona faatulou ma faatalofa i le pau o le malu, i le afio o lau afioga i le Fofoga Fetalai, afio lau afioga i le Tamaitai Palemia ma le Sui Palemia. Afifio foi Minisita o le Kapeneta ma Minisita Lagolago, ia tainane foi ia lenei Itu, le afioga i le Sui Taitai, ma sui usufono mamalu uma. Ia faapena foi le la toatolu e nonofo mai i le Itu lea le Pati fou. Ia faamalo le soifua maua i lenei taeao.

Le paia o Samoa o le a le oo i ai se tala a le sui usufono nei, sau se taimi ona maua loa o se avanoa. O paia o Samoa ua uma ona tofi, pe oo i ai se faamatalaga a Lautafi pe leai, e tumau lava paia na e oo i le faavavau.

A ua ou tulai atu e fai sina manatu puupuu, e puupuu lava se leo leaga o lea sa o tatou talanoa ananafi i le Tulafono Tau Faaofi lenei. O le mea tonu lava lea sa ou finau atu ai e aumai se lisi mai le Matagaluega. O lea ua manino lava le tilotilo, tasi lava le tilotilo iloa mea ia na tatou talanoa ai ananafi, aua ou te masalo o ananafi ou te lagona e oo foi i le afioga i le Minisita e na te le iloa le tele o mea ia e pei o quotes.

O le mea lea sa tauanau atu ai, ia faafetai i le afioga i le Minisita, faafetai i le Matagaluega, e avefa foi ma tulaga e mulimulitai ai isi Matagaluega, e aumai ni mataupu e technical foi lea, ia e sili lava ona faamanino mai i le language e malamalama uma ai tatou nei o sui usufono. E le faapea o tatou e tatou te iloa nei mea.

Ou te pipii i le manatu o le sui usufono o Anoamaa, e pei o lea e tilotilo atu iai e alu i lalo alu i luga isi mea, a o le tele lava o mea, pe a tilotilo i ai on average tau o mea uma nei. Ua pau i lalo isi mea, ae tele le sii i luga o isi oloa. I lou faauigaina o le tulaga lea, o nai mea ia e fiafia i ai ia o tatou tagata, lea ua sii i luga tau, aemaise lava o tatou tagata e fiafia tele i taumafa ia i mea ia o aano o manifasi. A silasila i ai, e sii uma lava i luga mai le 8 i le \$0.15 aemaise le 10%. 8% sii i le 15. O le mea sa leai se import excise lea ua sii i le 5%.

O lona uiga, ua alu uma i luga ia mea e mafai e nai o tatou tagata ona tua i ai i le taimi lenei. O isi mea ia lea e vaai atu ua lau i lalo, ia o mea ia e seasea ona taumafa ai lo tatou atunuu. Ia atonu o faletalimalo e latou te faatauina nisi o mea nei, o mea nei o lea e fai mai e alu ai i lalo ia faamai le pipisi. Faamalo atu i le afioga i le Minisita, o se mea lelei. Ia o mea ia o cauliflower ma broccoli, ia ailoga e taumamafa nisi o tatou i na mea. Po o le 80% o tagata Samoa e latou te le taumamafa i nei mea. O lea ua pau i pau i lalo le tau. E pei foi lea e manaia i le tilotilo ia ma isi mea.

E oo lava i lau luau ia e sau i i e pau i lalo le tau. Ia e manaia lava i le tilotilo, pau mai i le 30% i le 20% taro leaves. Ia o laupele o lea e alu i lalo le tau. Ia o ai e o... ia e alu atu lava i tua o le fale tau mai fai ai lea o le meaai.

FOFOGA FETALAI: Ou te fesoasoani atu i le sui usufono mamalu, sa tatau foi ona fesoasoani atu i le sui usufono muamua lea na auiliili mai ma tolaulau mai. O tatou lauga... e manaia lava le amataga faalauaitele mai, ae a laulau taitasi mai loa faapena, ia ua soli ai ia tatou Tulafono Tumau. Ioe, tatou lauga faalauaitele.

Afioga Hon LAUTAFI FIO SELAFI PURCELL: Ia faafetai lau afioga, ia leaga o lea e faafofoga lou itumalo faafofoga foi le atunuu, ia o mea ia o le a oo atu i tua. E le gata i totonu i i, o lea e malamalama ai tatou, ia e tatau ona malamalama le atunuu i mea ia e tatou te faia.

E manaia le mea lea o le faapau o mea ia o fualaau ma mea na. E tatou te tilotilo foi e i ai foi ia o tatou tagata local, o la e taumafai foi latou e faaiaia foi ia latou pisinisi. Ia aua ne i aumaia mea mai i fafo e faatauva ma latou mea la e fai. O le tulaga na o lea e taumafai atu. O lea foi e i ai ia nai kamupani ia e faia ia le vai. Ia o lea foi e vaai atu i le vai lea e aumai, o lea e toeitiiti lea tutusa tatou tau ma le kamupani vai lea mai i fafo.

O fafo e mau tupe tagata, e tele le volume o le latou vai ia e aumai, e maua la ia le latou tupe mama. Ae o tatou lea e taumafai atu, ia se i silasila i i lau afioga i le Minisita, te i ua o tatou soona tuu i lalo ia excise tax ma tiute ma faatusatusa foi lea, ia ae suffer ai la tatou local Industries. E tasi lava lene o mea e tatau ona o tatou puipui ai o insudtries a na i o tatou tagata o lea e tau faaolaola. Taumafai e discourage ia mea mai i fafo, mea ia e aumai, aua foi le tuu i ai mea faataugofie, faataugata ia musu ai e aumai, ae faaola ai ia tatou tagata ia ma latou pisinisi.

E pei o le mea lea ou te fesiligia lau afioga, o le timing, o le aumaiga o le Tulafono lenei. E le o po se lilo i le tulaga pagatia ua i ai le atunuu, o lo o i ai le lalolagi. O lea faatoa tau amata ona tau kiliki ia le tatou Economy. O lea faatoa amata ona tau gai. O lea ua amata ona omai tagata mai i fafo, e tau faagaioi ia le tatou tamaoaiga, ae o lea o le a alu atu ai ia mea nei, ae a pe a tuu atu i le isi tausaga. Se i tau faamasani nai tagata toe alu le pisinisi maua tupe maua ona mafai lea ona afford mea ia, ona mafai lea ona o latou maua faamanuiaga lea e maua mai i le tatou Tulafono lenei. Ae aua le vaai atu loa o le a tau... ia aua o le Aso 1 o Ianuari lea e faatino ai ia le tatou Tulafono lea lau afioga, Aso 1 o Ianuari, o le vaiaso atu lea.

Ia o le tele lava o tagata o la faatoa amata ona tau maua ni tupe, ae o le a matua aafia e oo lava i faletalimalo lea e i ai mea ia e latou te faatauina, ia e aafia i mea ia e tau o latou operations o le a i ai.

Ia o nai manatu na lau afioga, e tuu atu i le Matagaluega ma le Minisita, ia e faamalo i le isi vaega o le tatou Tulafono, ae se i tagai i isi vaega ia lau afioga, faafetai.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Lau afioga i le Fofoga Fetalai...

FOFOGA FETALAI: Ia se i tulai mai lau Afioga i le Minisita o Faatoaga ma Faigafaiva.

Susuga Hon Laauli Leuatea Polataivao Fosi: Sa ou manatu lava se i usi le saunoaga a le sui usufono mamalu ona avatu lea o le mea e fia faamalamalama ma le fesoasoani atu.

E pei o lea ua saunoa i le Minisita o Tiute e ala i le uiga ona o le taumafai e taofiofia ia oloa ia mai i fafo. Aemaise o oloa ia mai i fafo lea e faatupulaia ai ia faamai le pipisi ia e tatou te aafia ai. Ae o le fesoasoani ia a le tatou Malo lea e faaasolo, ia faaoga ia tatou manufasi i totonu o le atunuu.

A fia taumafa mamoe ia le tagata, fafaga au mamoe. A fia taumafa i tulaga o tapuvae puaa, fafaga ia lava au puaa. A fia taumafa foi i nisi o oloa ia e aumai mai i fafo, ia o le uiga lena o le polokalame lea e faasolo. O lea e faasolosolo atu ia le tatou Talomua, ma le tatou Uluai Seleselega. O le fatu lena o le substitution, lea e saunoa i ai le Minisita e a ia le Tulafono, o le tau taofiofi o le tatou ola faalagolago mai i fafo.

E matua tele ai ma le aafiaga o le masi suka, mai fatu, mai puta, nunu ma mea uma. Ae o tatou lava mea e feola i totonu ia tatou, e pei ole agaga lena. Ne i te i ua mamafa tele le upu, le atunuu e o le a sii i luga le mea lea ona o le a amo e ai ma ai. O lau tuualalo i le faafofoga mai a Samoa, a fia taumafa mamoe ia le tagata, fafaga ia lava au mamoe. Ia ona leai lava lea o se tiute, leai lava lea o se isi mea e i luga atu. A e fia taumafa manufata, fafaga ia lava au manufata. A e fia taumafa povi, fafaga ia lava au povi. Ia ona leai lava lea o se mea e tatou te pisa ai i le tiute lea. O le tiute, e faalagolago e taofi mea mai i fafo ae fai ia tatou mea iinei e taugofie mo tatou.

O si au fesoasoani atu lena ina ne i mamafa finagalo o le Sui Taitai ma le sui usufono o lo o saunoa.

FOFOGA FETALAI: Malo faafetai, ia ua tele foi le fesoasoani a le afioga i le Minisita i finagalo faaalua.

Afioga Hon Valasi Luapitofanua Toogamaga Tafito Selesele (Minisita mo le Soifua Maloloina): Lau Afioga i le Fofoga Fetalai...

FOFOGA FETALAI: Tulai mai lau afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele: E ese lou fiafia i le saunoaga a le sui usufono lea o Satupaitea. O le tagata foi e malamalama i mea ia o taumafa. E pau lava le mea ua ou tulai atu, ona o au o le Minisita o le Soifua Maloloina, o ananafi sa ou tatalaina ai ia le fale fou o le Faamama Toto. Ua fai faapitoa la potu mo afioga i sui usufono ma Minisita e agai i ai pe a faamama le toto.

O le mea sili ona ou faanoanoa e amata atu i le Maota lenei, e le tausia lelei o tulafono o lea e savali ai le Soifua Maloloina ma le tatou Malo. O le pese lava lea o lea foi e ave i tua e le tatou Malo ia tupe mo le faagaioiga o polokalame o le NCD. Pe afai la o le pese lea e manatu ai ia le Minisita ma le Sui Taitai ia faataugofie pea mea nei e tupu ai ia le faamai, ia ou te iloa la o se mea le fetai la lea mea. E pau lea o le mea e fia faamanino e le Minisita, soia ia le taumafai e fia lelei i mea valea se i tulou. A ia faasagatonu mafaufauga mo a taeao ma le lumanai ia manuia Samoa. Ia aua afai la o le a tatou tuuavanao i mea nei, ae o lea sa manino lava I le saunoaga a le Minisita, ina ia tuu i luga tiute nei aua le puipuia ina ia aua ne i tele le taumafa ma le faatau a tatou i meaai ia gaoa. Po o le tapuvae lava e gaoa se i tulou, ae o le agaga na o le tulai atu.

O faamai le pipisi ia, ua tele ai le numera o tatou tagata ua faamama toto i le taimi nei. Ia o lea la afai e fia talitonu i ai le Maota lenei, o le Aso Tofi sa tatala ai, e ova la i le 60 mai fou, o masini fou, ma potu fou matua manaia. Asiasi i ai a o le fautuaga i le Maota, tatou taumafai e foia le faafitauli lea. Ia manuia le Fono.

Tofa Hon Laufo Fonotoe Nuafesili Pierre Laufo: Lau afioga i le Fofoga Fetalai...

FOFOGA FETALAI: Malo, faafetai i lau afioga i le Minisita.

Tofa Hon Laufo Fonotoe Nuafesili Pierre Laufo: Leaga o lea na taua mai au i le saunoaga a le afioga i le Minisita. Leai o si vaega laitiiti lava lea e fia faasao.

FOFOGA FETALAI: Ia o le a tuu atu si afa minute...

Tofa Hon Laufo Fonotoe Nuafesili Pierre Laufo: A foi o le... ia faafetai. A foi lea na ou talanoa atu, e ave faatasi le tuu i lalo o le tiute ia faataugofie le oloa le tau o le soifuaga ma aoaoga. O aoaoga lelei ia e tatau ona aoa atu i le atunuu taumafa, taumafa tatau. Ia faapena ona faapaleni le taumafa.

O tulaga na sa tatau ona saunoa mai i ai le Minisita o le Soifua Maloloina. A la foi ua saunoa mai le Minisita o Faatoaga i tulaga ia ia aua ai ne i toe aumaia ia... se afai e gaoa mamoe la e i fafo e gaoa foi mamoe ia e i i. E

faapena povi i fafo ma povi e maua i inei e oo foi lava i puua. Tulou lava le mamalu o le Maota, o le mea lea e aumai i i, o meaai gaoa lea sa saunoa i ai le Sui Palemia.

FOFOGA FETALAI: Ia o lea e maua atu lau... ia e talitonu lava e i ai se isi mea lau afioga i le Minisita o Faatoaga

Susuga Hon Laauli Leuatea Polataivao Fosi: Ou te fautuaina le afioga i le Taitai o le Itu Agai, fai sana lafumamoe, ona ia iloa lea o le ituaiga lea e ola i inei, ma le mamoe e aumai mai i fafo. O le tele ia o le eseesega lau Afioga. E organic uma ia tatou mamoe lea e maua i inei. O tatou mamoe ia e aumai mai i fafo, e faapenei ia le mafiafia o le gao. O lea e mafua ona saunoa ia le afioga i le Minisita e a ia le Tulafono.

E oo foi i tatou moa, ia o na ua o tatou vaavaai i moa Samoa, e masomasoa. Ioe ae o tatou vaemoa ia e tatou te aai ai nei i le 70 containers i le masina, 40 futu, ia tatou te le iloa mea na e tatui ai. O lea e taumafai atu nei e toe faaatinae, fafaga moa Samoa, fafaga puua, fafaga ma mamoe, fai sau lafumamoe ona e iloa lea e le gaoa ia tatou mamoe ma tatou puua.

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fetalai... e manaomia nisi au mamoe ae e...

FOFOGA FETALAI: Ua ou manatu, e faamalulu atu i lau afioga i le Sui Taitai, leai ua...

Tofa Hon Lauofo Fonotoe Nuafesili Pierre Lauofo: O la e manaomia nisi au mamoe, ae manatua lelei, o tatou mamoe ia e i inei, o mamoe na aumai i. O Fiti. O le special breed lea...

FOFOGA FETALAI: Ia o lea ua oulua finau i mamoe, ae o lea e faatali le Maota.

Tofa Hon Lauofo Fonotoe Nuafesili Pierre Lauofo: E i ai la le mea lea e te saunoa mai ai, o le tele o le gao. Ia ua lelei.

FOFOGA FETALAI: E faamalulu atu, ua uma lou taimi.

Tofa Hon Olo Fiti Afoa Vaai (Minisita mo Galuega, Felauaiga ma Atinae Eseeese): E faigofie lava mea lau afioga i le Fofoga Fetalai...

FOFOGA FETALAI: Tulai mai lau afioga i le Minisita mo Galuega Tetele.

Tofa Hon Olo Fiti Afoa Vaai: A tausī au mamoe ona e talatalanoa lea i ai, aua ne i e gaoa mai pe a e matua.

Lau afioga i le Fofoga Fetalai, e i ai lava si mea lea sa ou faalogologo atu ai i le afioga ia Lautafi e faapea ua fiafia ina ua maua le pepa lea.

Afioga Hon Lautafi Fio Selafi Purcell: Lau Afioga i le Fofoga Fetalai o le mea e fia faasao.

Tofa Hon Olo Fiti Afoa Vaai: E faapea ua fiafia ai maua le... se i faauma atu lava, a uma atu loa ona e tulai mai lea lau afioga. E faapea o lea ua na maua le pepa ua tilotilo ai i mea ia o pasene alu i lalo ma pasene e sii i luga. A maitau e le Afioga ia Lautafi ua leva foi ona matou totonu o le Palemene o mea ia e tele na ou finau ai, ta te fiu e faiatu aumai pepa ia se i malamalama le Palemene ia a o le tali a lea o la ua i lalo le Tulafono Tau Faatonutonu o le tali a lea. O le mea lea Lautafi ua e sisila mai nei mo mea o faigamalo lelei (transparent) uma mea a lea ua avatu i ou aao? E a la e le lelei lena mea? O se aoaoga foi lea mo outou faafetai .

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai se toe aumai a si mea lea.

FOFOGA FETALAI: Se ua fai outou ma faalavelave ia tou manatu mai i le galuega a le nofoa o lea e taumafai atu. Malie Lauofo ua uma lou taimi, ua uma lou avanoa.

Tofa Hon Lauofo Fonotoe Nuafesili Pierre Lauofo: O le mea e fia faasao lau Afioga, leaga o le upu lea na lafo mai e le afioga i le Minista o Galuega “aua nei e gaoa mai pe a e matua” Aveese upu ia mai a tatou faamaumaga e le magaia i le faafofoga a le atunuu.

FOFOGA FETALAI: Ia ua lelei, o lea ua ou faalogologo atu iai ae ua lelei. Ua manatu ia o le a faaauau la tatou galuega.

Afioga Hon Lautafi Fio Selafi Purcell: Faamolemole sina avanoa sei faiatu ai se tala e puupuu a e te fai mai loa ou te nofo ou nofo loa i lalo tusa lava pe le uma lau tala na fai atu lau Afioga i le Fofoga Fetalai. Ou te faamalo atu i lau afioga ua tulai, leai o le pese lenei na amata a le Malo lenei o taumafai tuutuu i lalo le faamai pipisi ia o lenei lava ua outou tauaveina, tauave faalelei ma na ua iai seleni i outou lima, faatino ai ni aoaoga ma nisi auala. Aua lea e fai atu, e fiu foi a fai atu ia a o lea lava e alualu a i luga. Saunoa mai le Minista o le Soifua Maloloina o la e alualu a i luga ae ui i lea tatou galulue faatasi o lea e fai atu le manatu ona o le mea lea ua outou omai ai totonu i ni aafiaga o le aafia ai nei se taimi puupuu ae

le faapea a fai atu loa nei effective loa nei 20 tausaga o matou finau ai foi le mea lea. Faafetai lo'u uso lea Minisita o le Soifua Maloloina, e ese lo'u fiafia i le Minisita lenei ona o lae nofo ma faavivii vae a a'u o a'u o le Minista leai ou te le o toe Minista ae ou te le o toe fia Minisita foi. Faafetai ia te oe lau Afioga i le faaeaea mai pea o a'u o le Minisita. Soifua.

FOFOGA FETALAI: Masalo lea ua maua atu le finaglo o le sui usufono mamalu ae ua i ai foi le manatu, lea ua maua lou finagalo, ia ua ou manatu ia tulai mai le sui usufono mamalu mai Faasaleleaga Nu. 5.

Afioga PESETA VAIFOU TEVAGAENA (Faasaleleaga 5): Faafetai lava i lau Afioga i le Fofoga Fetalai, ua leva ona talitali lenei itumalo, ana ua fai a lau faaiuga ua uma foi le Fono. Lau Afioga sa fia fai atu a se manatu i le tulaga lea, e momoli a lau faafetai i le Afioga i le Sui Palemia mo Tulafono ona silasila lau afioga i le tulaga lea ua aliali, mai tele faleoloa ua ese le tulaga lea ua vaavaai ua tuueseese foi e le tele o Kamupani ia aemaise a tulaga lea mo mea tau flaps - mamoe.

O lea ta te fia fesili atu ai lau Afioga i le Sui Palemia ona o lea ua mautinoa ia tiute ia ua aumai i a tatou taumafa lenei i manifasi nei mai fafo, ona ua silasila foi i taumafa nei e aumai faatasi, tulou le faafofoga a le atunuu ia mealololo ma mea anogase tulou. O lea foi la ua maitau atu i le siitaga lenei pei o lea ua maualuga pasene ona o tulaga o mealololo. Ma o le mataupu lenei lau afioga i le Fofoga Fetalai e le se mataupu fou, o se mataupu ua tautalagia soo i totonu o le Maota lenei. A o la'u tuualalo lau Afioga e leai se auala foi lea e mafai ai ona fai se Tulafono ina ia tu le tatou (trade) foi lea tatou ma le aufaipisinisi fafo ina ia faasa ai ona toe aumai mamoe ia aveese a mealololo ae oka mai pea na o... atonu o lena o le a maua ai se fesoasoani mo le atunuu. Aua o lea e maitau atu i pasene ia i mea ia tau manifasi pei o lea e pau pasene o taumafa na o aano foi ia o manifasi ae pei e ala lava ona maualuga pasene ia o le tulaga e aafia ai le sofua maloloina o le atunuu. O lau tuualalo la pau lava lea o le auala e mafai ai ona pau le tiute o mea nei e maua ai le gafatia e tagata uma o le atunuu o meatau taumafa o se tulaga foi nei e ave ai se tatou talosaga i atunuu ia e supplier mai ia meataumafa, pe mafai ona aveese a mealololo pei o le moa, o le mamoe, o le povi ona aumai lea o oloa nei ia ua pau le tiute.

E oo foi i le tulaga lea lau Afioga Sui Palemia aua lea tatou te mautinoa pasene nei e ala ona sii, ina ia faaitiitia ai le auina mai totonu o le atunuu ia e pei foi o meataumafa foi nei suamalie tele. A silasila i le suka lea sa aumai lava e le tatou Malo i le tele o atunuu aemaise a le suka lea mai Fiti e tasi a le sipuni suamalie le ti ae i ai le isi suka lea ua lua, tolu sipuni e le suamalie. O la'u faafesili la lau Afioga afai la lea ua aumai nei pasene ia ua taugofie ia taumafa ia, se i silasila ifo la lau afioga pe faafefea la ona

faapaleni tiute o suka ia mai isi atunuu ia ma suka ia mai isi atunuu ona e eseese ia taste o suka nei.

E pei o sau lena tuualalo lau afioga, ae ou te talitonu la e faigofie le tulaga lea, ona o lea e saunoa soo lava le Afioga i le Minisita o Faatoaga ona o tulaga foi lele mo mea o faatoaga pei ua leva ona talitali le faatoaga lea ona o le honey lea foi na saunoa le afioga i le Minisita lea o le a faamalosi le uunaia o le atunuu mo mea o faatoaga honey foi lea ae ou te iloa ana ua tupu, lona uiga e le toe taugata le suka lea mai totonu o le atunuu lea o Fiji ae o le a tuu atu pea i lau Afioga i le Minisita ina ia faavavevave le faiga o le atinae ina ia taugofie mo le atunuu.

Ma lo'u faaaloalo lava lau afioga i le Fofoga Fetalai. Ia ua malie le sui lea taua lea...

FOFOGA FETALAI: Lau Afioga Minisita o Faatoaga ia saunoa lau Afioga Minisita.

Susuga Hon Laauli Leuatea Polataivao Fosi: Mo le faasaoina leaga o lea e saunoa le sui e le o faia Peseta ma lau fesili ua leva ona faataavili tulaga o le taumafaiga o le tatou honey o le polokalame o le SAFPROM e alu i le taimi lenei o lea ua faagasolo. O la e faafogafoga mai le aufaifaatoaga honey ma le atunuu sau e avatu ni au pusa e amata sau faatoaga. Ioe, la ua faaalu, ma e sao le tulaga o le faaogaina o le faasuamalie o le faaogaina o le honey i mea ia, e pau a lea o le manatu ina ia faasao o la ua faasolo polokalame, leaga o lea ua saunoa mai lau afioga e le i amataina, ua amata lau afioga i le sui usufono o la foi e i ai le toga honey tele i Saleaula i lou itumalo faasolo uma atu ai lava i Savaii atoa. Ae a manaomia le fesoasoani o loo maua le fesoasoani mo lou itumalo.

FOFOGA FETALAI: Malo faafetai atonu o lea ua manino i mea tau honey lea na lagalaga mai e le sui usufono mamalu mai Faasaleleaga Nu.5.

Ia o le avanoa lea le sui usufono mamalu mo Aleipata Itupa i Luga.

Afioga FUAAVA SULUIMALO AMATAGA (Aleipata Itupa i Luga): Lau afioga i le sui usufono mamalu, ia ua faafetai atu i lau Afioga i le Fofoga Fetalai mo le avanoa. Ia ou te iloa i lenei foi tulaga e maua foi le avanoa e faafeiloai atu ai i le paia o le Maota nei i le afio o lau afioga i le Fofoga Fetalai aemaise foi le Tamatai Palemia ma le Sui Palemia, ma le Vasega o le Kapeneta. Minista Lagolago aemaise foi o le Sui Taitai o lenei Vaega ma le mamalu i sui usufono. Ae faapea foi le Failautusi ma le Sui Failautusi o le Fono ma le aufaigaluega ma le mamalu o Ofisa Sili o Pulega ua tatou faatasi ma maolimauiina le tatou fonotaga i lenei itula.

Le maave eseese o Samoa ua potopoto ma faafogafoga mai, ia le avanoa lea e faafeiloai, ae ou te talitonu o paia o Samoa o le a taoto. E maitau foi e le

o toe tele ni minute o le tatou fonotaga o totoe o lenei itula ae o le a taumafai atu le faatauva'a o lenei itumalo o Aleipata Itupa i Luga e tusa ai o Tulafono Tau Faaofi. Ia o le agaga lava ia e ese le taua o le agaga na tapena ai le Tulafono, faatauua lea tulaga foi lele o mai le pipisi NCDs o lea ua tulai ai le pasene o le tiute, ia aemaise ai excise tax lea e faaopoopo i ai i nisi o taumafa ia e pei ona aumai i le lisi lea ae e i ai le tulaga foi lele e pei ona saunoa ai foi afioga i Minisita, o le agaga ina ia lagolago foi i le tatou atinae aemaise lava tulaga tau faatoaga ma tau lafumanu ia aemaise ai foi tulaga o taumafa mata, fualaa'u taumafa mata.

Ia pau lava si mea foi lele e avatu ai si faafesili ia o lea e foliga mai e pau i lalo tiute. O lona uiga e pei e feteenai, o lea ua tatou faapau i le tiute i mea ia e auina mai fafo ae pei e manaia lava le faatumau ai pea aua pei la o lea ua i ai le tulaga foi lea ua encourage ia sau pea lea foi oloa ia i fafo i tulaga o manufasi, aano o manu, aemaise ai foi o fualaa'u taumafa mata o lo o i ai ii, ia ae pe le i ai se aiaiga foi lele ina ia taumafai ai ia sii i luga ae ia lagolago le atinaega o le tatou atunuu i tulaga tau faatoaga ma tulaga uma faapea. Ia ou te iloa e pau lena o se vaega foi lele e avatu ai le manatu i le tulaga lea ina ia laugatasia le agaga na fai ai Tulafono Tau Faaofi o mealololo aua o lele ua taua e faapea se mafiafia o mealololo o mamoe a o lea ou te vaai atu sa 20 pasene a o lea ua pau i lalo i le 10% e le tiute. Ia pei la ua le feoeoeai ia tulaga ia ae faapea a o mea a ia e mafiafia le lololo, tumau ai pea le 20% ina ia faaitiitia le auina mai ae faaoga loa lafumanu ia ma tatou faatoaga lea e faagasolo i ai tatou miliona o atinae i tatou itumalo lea e faagasolo nei.

O le isi tulaga lau Afioga i le Fofoga Fetalai o tulaga ia o le... e pei ona avatu foi se manatu i le tatou feiloaiga ananafi i le tulaga lea o tatou vaitaumafa le vai lea o le natural water e le o faaopoopo ai le suka ma mea faapena i la'u tau maitau atu i ai, o lea sa i ai le 33%... oi 33sene e faaopoopo i vai ia auina mai fafo, ia a o lea ua i ai le fetuunai o lea ua pau i lalo i le 20sene e aafia faatasi ai ma vai local producers, vai ia fai kamupani faguvai o lo o iinei i Samoa. E i ai se atugaluga ia po o se tulaga foi lele concern ai ona o nai pisinisi ia o loo tua iai nisi ai foi o fai ni pisinisi iinei i Samoa i vaega ia o lo o faia faguvai aua o le... afai e 20sene lea ua pau ai nei, e 33sene lea sa charge ai vai ia inu po o vai mai fafo. Afai la e 20sene lea o le a pau ai faapea foi la ma le rate lea o le a faaoga i le tatou vai local producers ia e pei la e foliga mai o na e taaalo i luga o le level playing field. O fafo e malolosi tamaoaiga e faigofie i latou volume ona aumai flood ai tatou makeki ae tatou taumafai e faaolaola ia tatou producers ia i totonu lava o Samoa e le tatau ona fetuutuunai ai se fuafuaga faapena. E sao le faataitaiga lea na avatu i le tau o le faguvai 20 litre average lea iinei se mea o le lima tala (\$5) i le 20 litre lea i le faguvai ae a faapea e 20sene i le litre le tarrif lea ua ave i ai lona uiga o le 20 litre lena ua toe faaauau atu ai i luga le \$4. O lona uiga la a toe aluatu le tagata e utu

lana faguvai lea e 20 litre faapea lona uiga po o le \$10 tala lea o le a charge mai ai toeititi lava se mea o le 100% lea o le a toe faaopoopo i luga o le tau sa masani ai i le \$5 tala. Na pau la lona o si concern laitiiti foi lele ina ne i te i ua... aemaise lava le tulaga o suavai, e ui lava i tulaga o taumafa ia ae pei o le suavai o le numera tasi lea o le olataga o le tagata soifua. Aua tou te silafia lava, po o se mea o le ova i le 80% o le tino o le tagata soifua, e manaomia lava le vai. E tatau foi la ona tatou taumafai foi lea e fetuutuunai ia tatou tariffs ia, i le tulaga i le faataua ona maua o le suavai e nai o tatou tagata, le mamalu o si o tatou atunuu, ae faaoga lava vai o tatou local producers. O le tele foi o fai faguvai nei, e leai lava nisi e fai ni a latou sources, o le tele o latou e ola mai lava i le vai a le SWA le vaipaipa, ona aumai lea toe add ai latou filters, ia e taugata foi, o le power, o tau o filters ia i UVs ma mea faapena, ia e manaomia foi e latou sina \$1 e faaopoopo e service ai la ma maintain le latou pisinisi.

Ae pei o nai tulaga na, o se tuualalo i le Afioga i le Minisita, le Afioga i le Sui Palemia, se i fetuutuunai pei e manaia lava le 33sene pea o vai ia e aumai fafo, imported waters, ae alu tatou i le 20sene mo le taimi nei, ia pe faapau foi i le 10sene se i tau test atu le maketi po o le a le tulaga o i ai, aemaise o lenei taimi, afai lava foi ua vaai ua taugata le mea taumafa, ae vaai foi ua alu i luga ma vai a tatou fale faguvai ia o le a faatau. Ia ou te iloa o se tulaga lona e ono tulai mai ai. Ia, a o se tuualalo e taatia atu pea i ina i lau Afioga ma le mamalu foi o le Matagaluega, e toe silasila ane ai i le tulaga lea.

E taua le agaga lea pei ona avatu, na saunoa manino lava le Afioga i le Minisita o le Soifua Maloloina, ia o lau uo Minisita foi lava lea o la e ma te soalaupule lava le matou falemai i tua i Lalomanu, i le tulaga lea o le faatupulaia o le dialysis foi lea ona o meataumafa nei. Ae ou te iloa o se avanoa taua foi lea ona o lea ua tatou paia le tulaga o faamai e mafua mai i taumafa nei e agaga i ai tariffs nei e tau sii ai i luga, e faaitiitia le aumai ma amata ai ona tau faaitiitia le agai pea o tatou tagata e taumafa le mamoe ma tulaga faapena.

E na ona faaleo atu ai pea, aua o se lauga faalauaitete lea i lau Afioga i le Minisita. E toatele lava tagata o si o matou itumalo o lea e aumau i Apia nei ona o le taugata o pasese, suauu, tausavali mai lava e fai le latou dialysis po o le faamamatoto. Ia, o le talosaga, aua o lona e silafia foi e lau Afioga, o lea ua matauina foi o lea ua toe tender atu le toe extension o tatou falemai ma maota e alaala ai foma'i o itumalo taitasi.

Ia pe le o se avanoa lea, a maua lava se masini e tasi, ou te iloa e ova i le toa-fa tagata o si ou itumalo la e tausavali fai mai ua taugata ua ova i le \$4 le tau o le kiso. Ia, e toeitiiti \$100 e sau ai ma le toe foi atu foi i tua toe sau aua pe faatolu i le vaiaso. Ia na ona taatia atu pea i ou autafa faamolemole i lona tulaga. A i ai se masini e tasi i se vaega fou lea o le a taumafai atu ai le

extension lea o le falemai i Aleipata i Lalomanu, ia e talia ma le agaga faafetai e lenei itumalo le tulaga lea.

Ae pei o tulaga ia ua agai atu ai se faamatalaga, ona o ooooga ia o maitaga nei e mafua mai po o le NCDs po o faamai le pipisi ia e mafua mai lava ona o taumafa ia e agai i ai le mamalu o si o tatou atunuu. Tasi la lea o faamoemoega o le tatou taumafai foi lea ina ia more on a proactive foi lele, tatou taumafai la e faaitiitia le taumafa ma tausami i meaai ia. E sili lava le puipuia i lo le toe taumafai e togafiti.

Ou te iloa o se feau taua lea ona o le agaga o le tariff lenei, puipui si o tatou atunuu mai faamai nei, le auina mai o aano o manufasi ma le soifua maloloina o taumafa a Samoa, ou te iloa foi o le a faaitiitia le tele o pili a le tatou falemai, e auina atu ai a le faia i totonu o Samoa, e auina atu ai foi i atunuu mamao mo togafitiga.

Ia o se faatauva lea a lenei itumalo e tusa ai foi ma le Tulafono Tau Faaofi, a ia manuia tele le Fonousu a Samoa. Faafetai.

FOFOGA FETALAI: Malo saunoa i le sui usufono mamalu mai Aleipata Itupa i Luga. Ia, o lea foi ua faafogafoga atu le Minisita ma le Matagaluega i le folasaga foi pei ona aumai. Pau lava le fesoasoani atu ona o lea ua 2 sui usufono ia ua taua le eseese ma le afaina o tatou vai iinei i Samoa, ae na manino lava le faamalamalamalaga a le Matagaluega i le aso ananafi, leaga o lea e faafogafoga mai foi nai o tatou pisinisi vai i Samoa ina ne i te i ua... ae lafo atu i lau Afioga i le Minisita.

Ia ua i ai le manatu, o lea ua tatou taunuu i le tatou taimi malolo. E tusa ai ma le lafo e pei ona faatuina, tatou toe amata i le itula e 7:00 nanei i le afiafi. O le mea lea, o le a faataatiaese Galuega a le Fono Aoa, tatou toe amatalia i le itula e 7:00 i le afiafi.

Na faataatiaese Galuega a le Fono Aoa i le itula e 1:00 i le afiafi seia aulia le itula e 7:00 i le afiafi.